

妙丹法師編

蒙藏佛教史

མཚན་མཛད་པ།

འཇཉག་པོ།

འཇཉག་པོ།

འཇཉག་པོ།

འཇཉག་པོ།

འཇཉག་པོ།

འཇཉག་པོ།

འཇཉག་པོ།

འཇཉག་པོ།

འཇཉག་པོ།

大國師章嘉呼圖克圖題



國立臺灣圖書館典藏
由國家圖書館數位化

國立中央圖書館台灣分館



3 1111 001377173

第五篇 蒙古近代之佛教

第一章 哲布尊丹巴呼圖克圖

第一節 哲布尊丹巴呼圖克圖先世源流

哲布尊丹巴呼圖克圖。庫倫活佛之法號也。源出印度。其轉生化身。遠在釋尊時代。其現身於印度及西藏者。凡十四世。自釋尊迄第十四世哲布尊丹巴呼圖克圖之圓寂。計二千五百餘年。哲布尊丹巴呼圖克圖之先世化身。凡十四次。均使世界衆生。沐浴其德化。乃轉生於世界之各部。此轉生一事。活佛之外。人鮮知者。茲將哲布尊丹巴呼圖克圖之先世源流。謹列如下。

哲布尊丹巴呼圖克圖先世源流表。

歷 世 名 號 降生處

第一世 絡甫欽巴拉瓦騷瓦 印度

第二世

哪噶班交巴

印度

第三世

拉塔哪欽波

印度

第四世

浪蘇摩欽薩

印度

第五世

達爾瑪旺楚克

西藏

第六世

鄂賽慮巴粒

西藏

第七世

北耳噶拉札爾森

西藏

第八世

迦爾瓦哈囊

西藏

第九世

薩喀巴拉

西藏

第十世

札木森匝哩基

西藏

第十一世

班第達俏噶寧高得

西藏

第十二世

交啊囊崑嘎絡耳俏克

印度

第十三世

嘎借散札

西藏

第十四世

札阿囊昆噶寧波

西藏

第十四世札阿囊昆噶寧波。生於明神宗萬曆二年。爲西藏哇朗穀州呼畢勒罕。始學於究南寺。年三十。從乍米揚坎架札木素。受格倫大戒。越五年。著駕架耳曲伊窟經。歷叙印度經典之沿革。更越七年。建達庫丹奔茲西林寺於西藏之占州。始來蒙宣教。初。西藏第四世達賴喇嘛。因喀爾喀蒙古人。入藏禮拜之隔於厄魯特。由是西藏之呼圖克圖等。乃議別設一掌教喇嘛。坐牀於蒙古。宣揚黃教。公選札阿囊昆噶寧波以往。第四世達賴喇嘛更錫以大慈邁達里呼圖克圖之號。大喇嘛之由西藏而住持於蒙古者。以此爲始。札阿囊昆噶寧波被選爲蒙古之掌教喇嘛。宣傳教旨。修建寺院。靈異昭著。喀爾喀人極信仰之。衆尊以大慈諾們罕之號。并上博碩克圖濟農。號爲轉金輪徹辰濟農汗。年屆五十九歲。錄完金字甘珠經典。又發願前往西藏。敦請丹珠經典。至明思宗崇禎六年。圓寂於蒙古之庫倫。享年六十。以後在喀爾喀轉世爲哲布尊丹巴呼圖克圖。駐錫庫倫。

第二節 第一世哲布尊丹巴呼圖克圖

初。西藏第三世達賴喇嘛來蒙。宣揚佛教之際。喀爾喀有阿巴岱汗者。於明神宗萬曆五年。往蒙古之南歸化城。與之會晤。領受佛教要旨。迎經典歸。爲衆所服。其先喀爾喀無汗號。至是始稱汗。號幹齊賈巴圖。十三年遣使至阿勒坦汗。招引紅教之薩迦派喇嘛穀米南斯來蒙。以鄂爾坤河岸。杭愛山南麓。爲己游牧地。而自居於城中斗室。繪達賴喇嘛像。其後被稱無窮。阿巴岱汗於明萬曆十四年五月十五日。在特空特瑪爾所修復之城。建立額爾德尼昭。喀爾喀人始受薩迦派之佛教。越二年。阿巴岱汗遣使抵藏。招請第三世達賴喇嘛來蒙。行額爾德尼昭之開寺禮。第三世達賴喇嘛辭不願往。遣薩迦派喇嘛羅德伊機母伯代之。時阿巴岱汗未明西藏佛教奧義。僅知出資宏大。莊嚴其所建之寺塔。臣屬亦效仿而行。尙不知西藏之有薩迦派之紅教。與額爾德巴派之黃教也。翌年。阿巴岱汗親臨西藏。晉謁第三世達賴喇嘛。獻黃金與白銀之曼陀羅各一。黃白哈達各百。白馬及褐馬各百。暨種種之

寶石絹布等。於是第三世達賴喇嘛授阿巴岱汗以瓦察喇賽音汗之號。阿巴岱汗欲確立佛教於喀爾喀。請第三世達賴喇嘛賜以有靈驗之佛像。且請派遣喇嘛赴喀爾喀。盡力宏布佛教。第三世達賴喇嘛於其所敬愛之佛像喇嘛。一任其選擇。於是阿巴特汗遍遊各寺。而選佛像與喇嘛。歷時頗久。更請哇求拉達拉之像。當阿巴岱汗訪適任之喇嘛也。覩一喇嘛坐於說法師之末席。阿巴岱汗勸之曰。盍共往蒙古。該喇嘛答曰。我今雖不能行。後必行之。此喇嘛卽第十四世化身之札阿囊昆噶寧波。如是而此呼圖克圖始自預言其出現於喀爾喀矣。阿巴岱汗晉謁第三世達賴喇嘛之末次。請其巡行蒙古。行額爾德尼昭之大開基禮。第三世達賴喇嘛辭之。使西茲吉特架布求代往。且告之曰。我與爾必相見於喀爾喀。阿巴岱汗自西藏歸後。閱數年。一日。率近臣出獵。俄見平原遠際。有煙上騰。使近臣探之。使者歸報。有一奇人。坐而煮粥。形是喇嘛。阿巴岱汗追憶曾與第三世達賴喇嘛之約。此人得非第三世達賴喇嘛乎。遂近其前而拜之。近臣見坐者形狀污穢。頗怪訝。且嘖嘖而言曰。

幸哉若人。乃受大汗之叩拜也。其人見他人不叩拜。惟汗叩拜。則曰。幸哉此汗。乃拜他人所不欲拜之人也。頃之。奇人乃揚言曰。我等會見之處。後世其甚著名乎。當立標以記之。奇人既饗阿巴岱汗以粥。忽隱不見。於是始知其人爲第三世達賴喇嘛。今於喀爾喀履行會見阿巴岱汗之約也。阿巴岱汗遂命疊立鄂博。名其處爲伊遜珠爾。阿巴岱汗歿後。其子額列克嗣。號墨爾根汗。復建二寺二塔於額爾德尼昭。墨爾根汗子三。長袞布多爾濟。始號土謝圖汗。與其族車臣汗碩壘。札薩克圖汗素巴第。同時稱三汗。自庫倫額爾德尼昭建立之後。經五十年。蒙古哲布尊丹巴呼圖克圖之第一世呼畢勒罕。始生於喀爾喀。此呼畢勒罕爲札阿囊昆噶寧波之所轉世。係土謝圖汗袞布多爾濟之子。阿巴岱汗之曾孫也。

一日。土謝圖汗袞布多爾濟。途過其祖阿巴岱汗與第三世達賴喇嘛會見之處。俄見一喇嘛。甚相莊嚴。坐於前記之鄂博上。因問之曰。爾來此何爲。喇嘛答曰。我尊而祭之。忽焉其人不見。自是每日有虹現於空中。土謝圖汗袞布多爾濟及其福

晉罕篤札木素二人。每夜均得吉夢。福晉遂有身焉。喀爾喀活佛車臣汗聞之。贈土謝圖汗以禮物。且附書曰。

我輩乃斯茲巴庫德成吉思汗之子孫也。彼能統御我輩之偉人。將由爾生之。此余所以睠睠不已。擬欲與爾面晤。暢叙數日也。

書到後。車臣汗果訪土謝圖汗。飲宴數日而歸。時當酷熱漸消。無旱魃爲虐。疫疾亦不流行。眞佳節也。雨水調適。林野之間。百花燦爛。群鳥嚶嚶而鳴。人皆吉夢。汗夫妻每夜夢聞經典聖言。彩虹低垂。殆可手捉。車臣汗歸。使作搖籃。飾以寶石。送於土謝圖汗。土謝圖汗福晉臨蓐期迫。袞布多爾濟欲早遷於冬棲之場。得一可張幕處。偶至喇嘛預言建立鄂博之伊遜珠爾。見白犬產子。汗目爲吉瑞。命建冬期帳幕於此。時維九月。河水結冰。四望白雪皚皚。汗之樹帳幕地。忽有白花開放。明思宗崇禎八年九月二十五日黎明。亦有奇瑞。福晉方期臨產。其十六歲之侍婢。忽有乳汁外溢。深恥之。掩面而泣。福晉罕篤札木素慰之曰。汗妻將生子。故其寵愛之侍婢乳汁外

溢也。越數刻生子。福晉苦無乳。乃開全族會議。決以聖水洗其十六歲之侍婢。使爲乳母。臥嬰兒於車臣汗贈送之搖籃。使他婢日夜守之。翌年春。車臣汗復訪土謝圖汗。一日坐於幕中。手抱嬰孩。俄見三梵僧現於前。嬰孩似識此三人。而與之交語。且伸其手向之。車臣汗力加諸膝而止之。梵僧等忽失所在。車臣汗曰。此奇瑞也。此嬰孩壯健。將爲大喇嘛。普濟衆生之徵也。活佛車臣汗。遂以活佛之號冠嬰孩。僅自稱爲車臣汗。車臣汗歸。又遣相者相嬰孩。相者復奏曰。土謝圖汗之子眞偉兒也。其目角長。其瞳子與白眼之構造。非常方正。足証其能洞觀十界。至其身。則佛陀之徵候悉具。其爲活佛無疑也。三歲始能言。其最初之言爲阿牙拉嗎慈伊斯母山機吉屈伊機可耳羅巴耳慈拉那黑德。乃佛教經典之西藏語。人所常誦者也。稍長未就學。卽能日誦那嗎山架齊二大祭所誦之經文。依舊例。常聚衆小兒使侍汗子。共遊戲。此偉兒之所遊戲者。唯修寺耳。唯誦經耳。畫大喇嘛及佛像祭佛陀耳。他無所事事也。此其具有天然爲喇嘛之運命。蓋至明晰也。十一年。年四歲。駕母巴林喇嘛授之。

以戒。與以最初之名。乍那巴乍耳。翌年。王斯布耳立穀喇嘛。授以初級之僧位。拉布窘。冠以新法名羅布藏旺布札勒三。使爲察罕諾爾地方寺內之住持。王斯布耳立穀喇嘛。授以加母伯音機南。是卽住持之訓戒及叙任。命昇法座。名加母伯喇嘛。冠以斯嗎齊撒庫牙德乍。卽持大智釋迦旗者之尊號。此事爲喀爾喀人前未曾有之盛典。人皆爭獻禮物於新住持。喀爾喀諸王亦自其管下之人民中。割數帳幕以獻納之。蓋哲布尊丹巴呼圖克圖於喀爾喀新管民衆。此其犒矢也。喀爾喀人民均承認車臣汗授彼活佛之尊號。特表其職。獻以繞黃帶之帳幕。以此祝典舉行於察罕諾爾湖畔之故。改名錫喀圖察罕諾爾湖。

清順治六年夏。活佛向西藏出發。依例在穀母夫母過冬。翌年。始入藏。先投札什倫布寺爲僧。晉謁第四世班禪額爾德尼。贈送禮物多品。受種種法戒。旋赴布達拉。晉謁第五世達賴喇嘛。贈送禮品。領受奧妙之宗義法戒。活佛於是專心修法。居布達拉半載。初。薩迦派傳教蒙古。於喀爾喀各處。修建寺院。額爾德尼昭乃薩迦派

喇嘛執行開基禮。其後薩迦派喇嘛散處喀爾喀各地。宏揚佛法。活佛既屬土謝圖汗人血族。又爲喀爾喀之法王。薩迦派喇嘛見此貴人爲喇嘛化身。自詡得意。第五世達賴喇嘛緣西藏薩迦派喇嘛之勢日蹙。更欲宏揚額爾德巴派教義於喀爾喀。旋以活佛爲喇嘛化身。遂宣言。羅布藏旺布札勒三爲札阿囊昆噶寧波之呼畢勒罕。授以哲布尊丹巴呼圖克圖之尊號。許其外出時。用黃絹庇幕。活佛既受呼畢勒罕新位。詣西藏諸寺。行大布施。修持佛法。八年。第五世達賴喇嘛更授以額爾德巴派之本旨。勸其歸時。當弘布教義。建立寺廟。爲衆生謀利益。並攜西藏之著名喇嘛六百名及各種匠工畫工而歸。歸時首致力修建寺院。築造佛像。隨第一世哲布尊丹巴呼圖克圖同來之額爾德巴派喇嘛。見喀爾喀之薩迦派教義。不甚發達。非僅不與之爭。且視爲可與己派同化。唯不倦不撓。從事弘布。以漸輸入新規模式。使人民於輿義之中。而得宗其派也。倣乍米楊綽爾濟。建立伯格諾林寺。爲駐錫之所。分其所建立之布拉伊奔爲七部。卽所建之七部落也。例如阿母德烏那爾。雞撒諾山。

架伊。坐架伊。夫恒諾楊。達爾漢。夜母齊及烏耳立夜德等七部。十年。喀爾喀諾顏等。欲表敬意於古寺額爾德尼昭。延請第一世哲布尊丹巴呼圖克圖。而第一世哲布尊丹巴呼圖克圖。不住額爾德尼昭。諭諸王於錫崙圖烏拉山之側。特建格格奈布特烏格倫斯墨寺爲駐錫之所。翌年。更於肯特山南麓。修建新寺。

十二年。第一世哲布尊丹巴呼圖克圖。遣使北京。獻佛像。是年秋。第一世哲布尊丹巴呼圖克圖。在錫崙圖烏拉山修法時。決意欲伴隨從喇嘛六名。再赴西藏。於是各上馬提鞭。在途中有勇猛之守護神庇護。七騎奔馳絕迅。如七燕飛行。當宿於塔立牙夫爾遜時。七騎均被盜。翌辰起將出發。第一世哲布尊丹巴呼圖克圖怒曰。無數之守護神護我。機牙母撒郎果何爲者。於是命從者。向東方覓尋。適河塵揚自東方。漸近。則七騎均在。而二盜辮髮。且縛於兩馬之尾焉。乃繼續進行。時有三音諾顏部一蒙古人牧。羊見七燕向西南飛。以此鳥來喀爾喀。必在夏季。今暮秋而覩此異之。以爲必佛陀之降臨。乃驅羊歸。告其妻曰。今佛陀駕過。速煮肉備茶。我往饗之。

其妻調理肉茶畢。蒙人攜赴飛燕之方。時已暮。暝色蒼然。見平野有七人。蒙人近之。述曩者見鳥事。並獻食物。第一世哲布尊丹巴呼圖克圖食已。與以麵粉一掬。告之曰。爾祈福神時。納此粉於祭器中。則爾永久富裕。此預言後日果驗。至今此蒙人之子孫尚稱富饒。第一世哲布尊丹巴呼圖克圖僅七晝夜而抵西藏。人皆以爲可異。彼乃說明理由。謂旅行中每朝虔誦咒文。故有此驗。先訪札什倫布寺。第四世班禪額爾德尼贊其虔修佛法。告以返庫倫時。仍多誦經咒。而授以牙曼達架音王等諸法戒。一日。問喀爾喀人轉生者之事。第一世哲布尊丹巴呼圖克圖對曰。喀爾喀人轉生天界者雖不多。然轉生地獄界者亦不少。喀爾喀人死而再化身人間者。實繁有徒也。第四世班禪額爾德尼聞之。又命第一世哲布尊丹巴呼圖克圖教喀爾喀人專誦經咒。謂現時喇嘛之於喀爾喀。極佛教之隆盛。喀爾喀人今日生時。可謂已躋於菩薩之列。至死後實際成爲菩薩者。尚須賴此經咒之力也。次訪第五世達賴喇嘛。受法戒。得其秘法。十三年暮秋。第一世哲布尊丹巴呼圖克圖返庫倫。

十四年春。喀爾喀諸王及人民。群集額爾德尼昭。歡迎第一世哲布尊丹巴呼圖克圖之平安歸國。獻貢物。第一世哲布尊丹巴呼圖克圖乃做札什倫布寺式。行邁達里廻轉式。向喇嘛及人民。說教數日。第五世達賴喇嘛選派來蒙之西藏喇嘛。均輔助之。宏揚佛法。喀爾喀東部之人民。前來頂禮。土謝汗圖之子。第一世哲布尊丹巴呼圖克圖之甥。噶爾丹多爾濟王。每年必訪第一世哲布尊丹巴呼圖克圖。求釋其妻不懷妊之罪。而並求子。第一世哲布尊丹巴呼圖克圖答曰。爾欲得子。我夙所知也。請暫止其期。終告子之當生。且我於奧妙不可思議之西藏旅行時。訪逸士所棲之山。嘗於巖窟內。見機拉潘之化身阿爾塔西茲達喇嘛。因問之曰。蒙古之王。急欲得子。爾何不應其意矣。彼大悟澈底。乃答之曰。將轉生爲蒙古王。我爲証確此事。曾向彼要得一書。今呈於爾。此喇嘛今已荼毗。其魂想已入爾妻之腹矣。但不久噶爾丹多爾濟王之妻。果懷妊生子矣。後爲喀爾喀王。而冠以達爾漢親王之銜。十六年。喀爾喀之諾顏各部。及來自喀爾喀旗之僧俗等衆。相會於喀爾哲伊圖察罕。

泊。依例。第一世哲布尊丹巴呼圖克圖常駕臨。行莊嚴之誦經並授法戒。顧斯會也。第一世哲布尊丹巴呼圖克圖兼與尊號於西部喀爾喀諸王及喇嘛等衆。西藏佛教。始普及於喀爾喀全土。衆推哲布尊丹巴呼圖克圖爲喀爾喀諸王及喇嘛中之獨尊者。康熙十年。第一世哲布尊丹巴呼圖克圖。自西藏購置丹珠經典全部。翌年。肯特寺之工程告竣。此寺係二十六年之前所開工者。二十年。喀爾喀人於額爾德尼昭貢獻第一世哲布尊丹巴呼圖克圖。第一世哲布尊丹巴呼圖克圖乃修經咒。執行邁達里廻轉式。欲普施教化於喀爾喀。於二十二年。向西藏購置全部甘珠經典。創製多數佛像。中有其手造之佛像一銀塔八。並遣使北京。贈聖祖佛像二尊。

初。喀爾喀之札薩克圖汗成袞。以額琳沁之亂。屬衆潰。多往依土謝圖汗察輝多爾濟。成袞屢索不獻。與搆釁。成袞卒。噶爾丹謀掠喀爾喀。誘成袞子沙喇。攻察輝多爾濟。沙喇因會噶爾丹於固爾班赫格爾。德光德赫等從往。察輝多爾濟惡之。追殺沙喇及德光德赫。故自康熙十九年之後。喀爾喀內訌頻起。幾無寧歲。二十三年。

二月。聖祖親喀爾喀之擾亂。詔理藩院尙書阿喇尼。齎敕西藏第五世達賴喇嘛。命遣使赴喀爾喀。諭二汗和。並賜優詔於第一世哲布尊丹巴呼圖克圖。命其臨喀爾喀諸王之會盟。與第五世達賴喇嘛之使節。合力勸告諸王而和解之。二十五年四月。聖祖勅諭喀爾喀七旗汗濟農台吉等曰。

朕統御寰宇。中外一體。務使交相輯睦。共享昇平。乃爾右翼札薩克等內自相亂。兄弟人民多歸左翼。札薩克兄弟人民亦有歸於左翼者。爾等以兄弟之親。互相吞併。異日必致交惡生亂。朕心惻焉。康熙二十三年。曾頒勅於達賴喇嘛。議遣使諭和爾等。而達賴喇嘛亦謂朕俯念道法。慈憫衆生。有如父母。意甚善也。特遣噶勒丹錫喀圖前來。朕亦命尙書阿喇尼台吉巴忒馬什畢力克圖喇嘛阿齊圖綽爾濟等。與之偕往。爾汗濟農台吉等。當仰體朕意。及達賴喇嘛之心。盡釋舊怨。將兄弟人民各歸本札薩克。令其和協。照舊安居。不但仰副朕命。與達賴喇嘛之意。卽爾七旗永無離散之苦。爭鬥之亂。福祿所綏。亦且無疆矣。

是年七月。始行開會。並定庫倫之伯勒齊爾。爲會盟之地。第一世哲布尊丹巴呼圖克圖。與西藏第五世達賴喇嘛所遣之使噶勒丹寺錫喀圖。說喀爾喀諸王以和解輯睦。恪守盟約。永絕紛爭。不久而內爭遂靖。

顧斯會也。第一世哲布尊丹巴呼圖克圖之席。隔絕他人。而與第五世達賴喇嘛使節噶勒丹寺之錫喀圖席相並。時準噶爾部蟠據於阿爾泰山以西。天山以北之地。其酋噶爾丹。垂涎喀爾喀。責第一世哲布尊丹巴呼圖克圖之坐席爲僭越。而以喀爾喀人對於達賴喇嘛殊無敬意。及殺其族人多爾濟札布爲名。遂於康熙二十七年春。率兵侵喀爾喀。直衝札薩克圖汗領土。自翁金河分兵兩路。一路推進車臣汗游牧地。一路向哲布尊丹巴呼圖克圖駐錫之額爾德尼昭出發。於是第一世哲布尊丹巴呼圖克圖攜土謝圖汗察罕多爾濟之妻子。共隱於烏木克爾。後聞四衛拉特人劫掠車臣汗游牧地。出喀爾喀境。駐於巴朗蘇尼特。及噶爾丹侵車臣汗部。敗土謝圖汗聯軍於鄂羅會爾鄂湖畔。飽載西歸。喀爾喀諸王當挫敗之餘。乃會

盟於烏里雅蘇臺。第一世哲布尊丹巴呼圖克圖因問衆曰。今而後將如何維持存
在耶。喀爾喀人同聲答曰。整理我國政治。以圖安固。活佛之所知也。第一世哲布尊
丹巴呼圖克圖曰。我之北有俄羅斯國。政治平允。然其地一不能傳佛教。二則其民
之衣裾曲於左。我等不可往。我之南有中國。政治亦平允。其國平和安寧。尊崇佛教。
卽其衣。亦似仙人所服者。國富財多。錦繡絹絨。不可勝數。我等若赴其地。可邀萬年
之福。第一世哲布尊丹巴呼圖克圖既告以種種之便利。因勸喀爾喀人奉中國正
朔。衆欣然羅拜。議遂決。於是第一世哲布尊丹巴呼圖克圖奏於聖祖。願盡率喀爾
喀人歸中國保護。得其允許。部衆仍棲止於烏里雅蘇臺。三十年四月。聖祖親巡邊
外。與喀爾喀部衆大會於多倫諾爾。受其朝賀。第一世哲布尊丹巴呼圖克圖率諸
汗晉謁。旨升第一世哲布尊丹巴呼圖克圖爲大喇嘛。任以喀爾喀宗務管理之權。
待以喀爾喀百官有司首班之禮。從諸部所請。於其地建寺。賜額彙宗。命百二十旗。
旗各一僧居之。寺有正副達喇嘛各一員。部頒印信。俾正者掌之。其文曰。總管多倫

諾爾喇嘛班第札薩克大喇嘛之印。御製碑文記其事。

第一世哲布尊丹巴呼圖克圖。自多倫諾爾會見之後。隨駕赴北京。翌年夏。與聖祖同赴熱河山莊。三十二年。帝病。第一世哲布尊丹巴呼圖克圖爲之祈福。修法誦經。俄病頓愈。衆咸以爲靈驗。益加優禮。常賜召見。言笑爲歡。迨噶爾丹敗。喀爾喀人歸還故土牧地之時。第一世哲布尊丹巴呼圖克圖均冬寓北京。夏寓熱河。三十六年。聖祖親征噶爾丹凱旋。第一世哲布尊丹巴呼圖克圖奉詔於張家口外之布爾噶蘇臺迎駕。隨駕還北京。翌年元日。隨駕參詣諸寺。至旃壇寺。與聖祖並座而坐。足證當時聖祖優待第一世哲布尊丹巴呼圖克圖之優禮。夏。隨駕赴五臺山。三十八年春。第一世哲布尊丹巴呼圖克圖之兄土謝圖汗察輝多爾濟卒。第一世哲布尊丹巴呼圖克圖始歸喀爾喀而奔喪焉。夏返熱河。冬仍隨駕赴北京。四十年。復返喀爾喀。修理準噶爾人侵掠喀爾喀時所破壞之額爾德尼昭。冬返北京。自喀爾喀屬清。第一世哲布尊丹巴呼圖克圖留居京師者。計數十年。出入大內。簡史具載。茲

撮要略述之。

一日。聖祖召第一世哲布尊丹巴呼圖克圖。而命之於姆指前節大之紅色寶玉。雕刻佛像。第一世哲布尊丹巴呼圖克圖善雕刻之。聖祖嘆爲工匠。益尊敬之。宮人多懷疑忌。聖祖欲解宮人之惑。爲之設座於御室中。下藏佛像。而後使人召第一世哲布尊丹巴呼圖克圖。及至。聖祖指所設之座使坐。第一世哲布尊丹巴呼圖克圖於入座之前。先置手座上。座下所藏佛像。忽騰出而入於掌中矣。因問曰。此佛像緣何現於我之座下哉。聖祖顧左右曰。朕未明告爾等。哲布尊丹巴呼圖克圖係真正佛陀。爾等憤朕以禮遇彼。今觀此異。豈非所當尊敬者乎。一日。第一世哲布尊丹巴呼圖克圖遣僧往市購水晶。方僧購來而呈於第一世哲布尊丹巴呼圖克圖也。適聖祖遣使傳命。召之入宮。此間聖祖又置甘珠經典於其所設之座下。及聖祖勸其就座。第一世哲布尊丹巴呼圖克圖密會其意。坐時先以手中水晶觸座而後坐。聖祖問曰。爾呼圖克圖與佛陀聖言孰尊。願聞之。爾之座下有甘珠經典也。第一世

哲布尊丹巴呼圖克圖答曰。余已知之而早去之矣。聖祖命取經典檢查。無一字存。在。皆白紙耳。聖祖驚問其故。答曰。已呈水晶。經文悉寫之矣。聖祖嘆曰。承爾之賜。朕獲此寶也。遂以水晶頂額祈福。使祭獻焉。第一世哲布尊丹巴呼圖克圖之名益隆。帝后欲見之。請於聖祖曰。呼圖克圖之美。殆猶新出之皎皎明月。何不使我親聞聖訓乎。聖祖許之。召之入宮。使於皇后宮女前。宣講教義。后大喜。賜以眞珠法冠。錦繡法衣。后問聖祖曰。呼圖克圖果何爲者。菩薩歟。抑佛陀歟。聖祖曰。哲布尊丹巴呼圖克圖乃佛陀化身也。一日。聖祖使近臣召之。使至。見第一世哲布尊丹巴呼圖克圖端坐。其顏如團圓明日。光輝燦然。驚歸。奏於聖祖。聖祖曰。佛陀可得爲種種之變容者也。他日。聖祖召之問曰。爾乃哲人。何不將四衛拉特之亂。與蒙古人之歸順清國。警告於朕乎。對曰。已告之矣。余所呈之寶玉佛像。曾觀之乎。因檢查其像。果有贈聖祖書。歷述諸民一致擁戴清國。尤祈教義之弘布。第一世哲布尊丹巴呼圖克圖指之曰。此豈非喀爾喀人奉清國之冊。願受大皇帝之保護哉。聖祖曰。朕未之知也。聖

祖賜茶。第一世哲布尊丹巴呼圖克圖受茶而潑於南方。聖祖問曰。朕賜爾茶。爾何棄之。答曰。適時南方一城遭大火。我今滅之矣。聖祖遣使往探。粵省一城。果有祝融肆虐。炎燄冲霄。忽見西北隅降褐色之雨。火遂熄云。

厄魯特亂起。聖祖始遣之歸喀爾喀。以安民心。第一世哲布尊丹巴呼圖克圖歸喀爾喀後。修建大寺於庫倫。造佛像。佈宗規。定祭禮。設僧院。不遺餘力。擴張教務。覩厄魯特之亂。乃致函各旗諸王。勸其互相協助。爲戰守之具以防之。四十四年。土謝圖汗兵駐防阿爾泰。四十六年。駐防烏梁海。當出征時。第一世哲布尊丹巴呼圖克圖親垂訓令。祈求勝利。四十七年。聖祖降詔。第一世哲布尊丹巴呼圖克圖。略曰。準噶爾人在西藏。殺戮喇嘛甚多。殘暴酷虐。達於極點。今與謀教義之利益。使爾駐屯於此。但當聽朕一言。不可輕視目下形勢。

第一世哲布尊丹巴呼圖克圖。因受聖祖之詔。屢致書策妄喇布坦。更遣使勸告。中止侵略西藏。勿擾蒙藏人民。帝深嘉之。

五十二年。聖祖六旬萬壽。蒙古諸部。咸來朝賀。修建剎宇。爲帝祝釐。乃定熱河。築溥仁溥善二寺。御賜寺額。御製溥仁寺碑文。賜之詞曰。

康熙五十二年。朕六旬誕辰。衆蒙古部落。咸至闕廷。奉行朝賀。不謀同辭。具疏陳懇。願建剎宇。爲朕祝釐。朕思治天下之道。非奉一己之福。合天下之福爲福。非私天下之安。遍天下之安爲安。柔遠能邇。自古難之。我朝祖功宗德。遠服要荒。深仁厚澤。淪及骨髓。蒙古部落。三皇不治。五帝不服。今已外中無別矣。論風俗人情。剛直好勇。自百年以來。敬奉釋教。並無二法。謹守國典。忘敢隕越。不識不知。太和有象。朕每嘉焉。鑑其悃誠。重違所請。念熱河之地。爲中外之交。朕駐蹕清暑。歲以爲常。而諸藩來覲。瞻禮亦便。因指山莊之東。無關於耕種之荒地。特許營度。爲佛寺。陶甃於冶。取材於山。工用無輪輓之勞。金錢無踰侈之費。經始訖功。告成不日。歷觀往古。遙溯前朝。版籍有區。幅員未廣。茲熱河之奧壤。廼紫塞之神臯。名號不掌於職方。形勝無聞於地志。朕以淳德。撫育萬方。邊壤

之外。悉爲畿甸。諸藩於此。建寺介福。率先恐後。無小無大。忘不來同。觀我觀民。思維此理。特題額曰溥仁。將欲汪濊之澤。均霑率土。升恒之慶。廣洽普天。遍覆含宏。民胞物與。咸躋壽考。各遂生成。請諸藩祝朕之忠誠。爲萬方祈純嘏之錫。爰記斯文。勒諸貞石。康熙五十三年三月十八日。

六十一年。聖祖駕崩。訃達庫倫。第一世哲布尊丹巴呼圖克圖與土謝圖汗達爾漢親王惇多布多爾濟同赴北京。弔喪。第一世哲布尊丹巴呼圖克圖抵京後。有疾勿癒。左右見其瀕於危境。問曰。今欲轉身何處。第一世哲布尊丹巴呼圖喀圖答曰。第二王若在申年或酉年生女。則不可不留之於家中。是卽第二王達爾漢親王在申年或酉年所生之女。其所產之子。當爲第二世哲布尊丹巴呼圖克圖之呼畢勒罕之意也。奏聞世宗。勅許達爾漢親王履行第一世哲布尊丹巴呼圖克圖之遺囑。達爾漢親王與第一世哲布尊丹巴呼圖克圖決別。遂歸國。而與和託輝特游牧民達什之女。生於申年者結婚焉。雍正元年正月十四日。第一世哲布尊丹巴呼圖

克圖圓寂於北京。圓寂之日。庫倫哲布尊丹巴呼圖克圖宮殿之上。現五色虹。坐牀之處。突發燐火。衆知第一世哲布尊丹巴呼圖克圖遭遇非常變故。爲之誦經祈福。理藩院奏曰。

哲布尊丹巴呼圖克圖。黃教中第一流人也。數世行善。垂九十年。當噶爾丹叛時。率七族喀爾喀等來歸。最有功。其家世。喀爾喀汗之子。土謝圖汗之弟。遭逢聖朝。疊膺殊遇。前年聖祖仁皇帝面諭之曰。歲癸卯。朕年七十。爾年九十。是年爾必來。勿食言。呼圖克圖承旨還。今遵諭來京。晉謁梓宮。志願已遂。泊然示寂。其能履行勅旨若此。臣等鑒之。請如達賴喇嘛班禪額爾德尼例。賜以名號印冊。

世宗覽奏。賜諡度化主。世世永稱呼畢勒罕名號。並給誥命金印。在京開弔。歷數越月。旣而帝御駕來弔。土謝圖汗等屢辭弗聽。親詣棺前。懸帕奠茶。以表恭敬追悼之意。並諭旨曰。

呼圖克圖極蒙皇考軫念。禮遇加隆。皇考升遐。係甲午日。今呼圖克圖圓寂。亦係甲午日。佛果聖因。證明不昧。呼圖克圖非尋常僧人比。朕親往懸帕供茶。以盡朕心。將此旨傳與喀爾喀汗王台吉及呼圖克圖屬人等知之。

理藩院以龕座還國。請派大臣護行。世宗特命敦郡王允祇。世子弘晟。齎賜印冊奠儀。散秩大臣尙崇禩等。護龕座行。

初。聖祖在位之時。嘗言第一世哲布尊丹巴呼圖克圖圓寂。當賞銀十萬兩。修建一寺。以爲寢陵。雍正五年。世宗遵遺詔。遣使喀爾喀。探察地脈。溯伊奔果勒河支流。諾母特哥立崩之側。布隆汗山之南麓。偶見幼童小女。問其名。幼童答稱阿母耳。譯言慶。小女答稱巴楊斯夫郎特。譯言寧。地旣形勝。益以嘉名之配合。使者信以爲祥。奏聞。詔許之。命從國庫中支銀十萬兩。修建寺院。自雍正五年迄乾隆元年。全功告成。賜名慶寧。乾隆二年。高宗御製慶寧寺碑記。賜之。詞曰。

惟天眷佑我清。不冒萬國。日月所照。雨露所需。罔不服從。當太祖太宗時。西方

達賴喇嘛班禪額爾德尼。景慕聖德。率先輸忱。世祖章皇帝定鼎燕京。達賴喇嘛萬里入覲。貢獻勿絕。逮聖祖仁皇帝親統六師。平定朔漠。則有哲布尊丹巴呼圖克圖。率七旗喀爾喀之衆。朝行在所。特封爲大喇嘛。俾掌黃教。康熙六十年冬來朝。明年示寂於京師。皇考世宗憲皇帝。遣使護歸其國。恩禮有加。雍正五年。命大臣齎幣金十萬兩。卽古所居庫倫地。剏建大刹。延及徒衆。講經行法。如達賴喇嘛班禪額爾德尼在西域時故事。乾隆元年工竣。欽定寺名曰慶甯。御題福祐恒河以賜。復允董役諸臣。請化石刻詞。俾紀其事。朕維天生蒸民。若有恒性。性無勿善。不以形體而睽。不以疆域而隔。因其同善之情而利導之。此帝王之教所以立也。黃教行於西北諸藩。無貴賤。無不奔走信嚮。要其爲說。主於戒慧從善。今使蒙古之衆。誦習其文。皈依佛諦。其興起於善也必易。人人樂趣於善。將見邊方赤子。同植善緣。疆域乂安。中外禔福。蒙被慶澤。永永無斁。我祖宗緩懷藩服。錫福寔區。萬國咸甯。民生康阜。主斯寺者。惟有勸導群生。擴

乃善性。一心嚮化。安享我國家太平之福。庶無負皇考嘉惠諸藩之德意也夫。
編修萬承蒼所撰進也。

乾隆四十四年。自庫倫移第一世哲布尊丹巴呼圖克圖之龕座。供奉於慶寧寺。

第三節 第二世哲布尊丹巴呼圖克圖

達爾漢親王名惇多布多爾濟。幼育於北京之後宮。康熙三十六年。娶中國郡主。賜號和碩特駙。三十九年。受任土謝圖汗。在位未滿一載。以舉動乖舛。被清廷削職而降位焉。後隨軍之西藏。與準噶爾戰。屢建奇功。六十一年。隨第一世哲布尊丹巴呼圖克圖至北京。奔聖祖喪。世宗繼承大統。始復達爾漢親王職。且以宮女爲皇女而嫁之。加授固倫額駙之號。及第一世哲布尊丹巴呼圖克圖病重。遵其遺囑。卽赴蒙古。再娶和託輝特游牧民達什之女。名茲拉安塔拉巴牙耳。年十九歲。生於申年者結婚焉。結婚之日。常得奇夢。達爾漢親王夢其手珠大珠及姆指上節。化爲金剛菩薩。其妻茲拉安塔拉巴牙耳。夢第一世哲布尊丹巴呼圖克圖初來牆內。後入

室中。二人屢夢其帳幕爲黃色。雍正二年仲秋月一日黎明。第二世哲布尊丹巴呼圖克圖呼畢勒罕生焉。時幕內之煙。突發窗外。光輝燦爛。奇觀畢現。幕上長虹皎皎。景色蒼然。翌晨。達爾漢親王患病。瀕於危。乃遣使至那魯班禪呼圖克圖。爲王懺悔。時那魯班禪呼圖克圖尙未聞達爾漢親王生子。然於精神上已洞悉第二世哲布尊丹巴呼圖克圖呼畢勒罕之表現。遂問使者曰。產後之胞衣如何。使者答曰。埋於地矣。那魯班禪呼圖克圖曰。憶達爾漢親王受罰者。正爲此也。此胞衣不可不獻。使者歸。傳那魯班禪呼圖克圖語。衆喇嘛集議。直如其言而行之。怪哉。胞衣入地者已十日。掘發之時。芬芳馥香。恍同柏樹果。以之作祭品。尤奇者。達爾漢親王之疾。亦立癒也。

時蒙古第二世哲布尊丹巴呼圖克圖呼畢勒罕之選定權。尙操之於西藏。雍正二年秋。特遣使者赴拉薩。提出蒙古喇嘛所指定候選之第二世哲布尊丹巴呼圖克圖呼畢勒罕。若土謝圖汗達爾漢親王之子者四人。請確定孰爲第二世哲布

尊丹巴呼圖克圖之呼畢勒罕。第七世達賴喇嘛與以奧妙之答覆曰。喀爾喀達爾漢親王子之族古。蒙古使者受此不可思議之答覆。語意不明。遂轉道北京。晉謁世宗。奏聞赴西藏答覆之語。時世宗於蒙古使者赴藏之日。夢第一世哲布尊丹巴呼圖克圖入見。已而告曰。我已轉生於達爾漢親王妾之腹中矣。當時世宗閱蒙古使者奏。卽諭曰。若指達爾漢親王子。而謂其族高尚古舊。則應據法座。時喀爾喀之士謝圖汗與車臣汗。以第二世哲布尊丹巴呼圖克圖之呼畢勒罕事。互相紛爭。三年夏。蒙古使節歸喀爾喀。齎世宗勅旨。以達爾漢親王之子昇法座。紛爭乃止。

時第二世哲布尊丹巴呼圖克圖呼畢勒罕。年僅二歲。育於其父達爾漢親王處。一日。達爾漢親王抱之。坐於幕側。第二世哲布尊丹巴呼圖克圖呼畢勒罕俄而呼曰。視哉。天有虹。二佛游。達爾漢親王仰觀。果爾。雍正六年。四歲。受佛戒於棟科爾之呼圖克圖羅巴藏丹巴凍米。七年。昇法座。在臛達克陀羅海舉行慶祝典禮。盛極一時。八年夏。種痘既畢。翌年上書清廷。請召入京。後以準噶爾之亂不果行。十年。以

避準噶爾亂。駐節多倫諾爾。及準噶爾亂平。世宗崩。高宗入承大統。喀爾喀喇嘛復請入京晉謁。乾隆元年夏。得其勅許。第二世哲布尊丹巴呼圖克圖呼畢勒罕。卽啟節南行。將抵北京。高宗遣王公大臣出迎。並賜哈達。及入安定門至雍和宮側。帝使在京諸官。駐京呼圖克圖及喇嘛等出迎。更賜哈達珍品。乃導之入。駐節於皇城外之帳幕內。甫入幕。高宗駕臨。第二世哲布尊丹巴呼圖克圖呼畢勒罕出迎。攜手入幕。設座於高宗之東側。高宗親以手施其座褥。使近己座。諭之曰。呼圖克圖近朕座。品茗時。高宗問曰。呼圖克圖途中無恙乎。不待答。繼諭之曰。爾初到。姑息數日。改日再歸。謂近侍曰。萬事留意。凡適呼圖克圖康健者。不可使缺。第二世哲布尊丹巴呼圖克圖呼畢勒罕答曰。沾大皇帝之恩。我來無恙。且遵命在此住數日。乃歸。高宗問曰。今爾所學爲何。答曰。學茲阿尼特。高宗默視良久。問曰。爾幾歲矣。答曰。十四歲。又曰。今可參拜山湯斯乎。高宗曰。可。曰。宜以何時。高宗曰。爾何時往行參拜均可。爾與衆僧皆可游於我園。高宗以第二世哲布尊丹巴呼圖克圖呼畢勒罕雖幼。頗有極

出之相。出謂人曰。第二世哲布尊丹巴呼圖克圖呼畢勒罕之聰慧。衆所莫及也。其後晉謁。高宗取頸上所懸之珊瑚手珠賜之。隨行之二十二喇嘛。各賜珠玉哈達。復賜第二世哲布尊丹巴呼圖克圖呼畢勒罕黑貂皮六十張。絹九疋。龍樣織絹一疋。使皇室宗親大臣招待之。常贈各種食物及果品。並給以日常所需之麪粉蔬菜羊肉藥物等類。及歸喀爾喀。勅許使用黃色圍牆行宮。賞銀十萬兩。以作歸途之費。

第二世哲布尊丹巴呼圖克圖呼畢勒罕歸喀爾喀後。與左右喇嘛共居庫倫。或修學。或遊戲。一日。坐於衆喇嘛之間。俄然嬉嬉而笑。衆喇嘛問其故。答曰。寺東有二童牧犢。試問彼等何爲者。第二世哲布尊丹巴呼圖克圖呼畢勒罕之門衛喇嘛循其所指方向而趨。果見二豎子。先是不堪酷熱。乃避暑於土喇河懸崖下。談話間。忽思去歲冬期之所學經文。猶未嘗忘也。乃互謳吟讚歌。既見羣犢逃散。欲集之。行未數武。則所坐之巖。俄然奔入水中。門衛喇嘛歸告。第二世哲布尊丹巴呼圖克圖呼畢勒罕曰。此二豎子就既往行事。雖應生理於崩巖之下。然菩薩喜聞讚歌。暫支

懸巖待豎子去而後放手也。故我喜見菩薩保護其信徒。故於游行之餘。不禁嬉嬉然而笑也。又一日。第二世哲布尊丹巴呼圖克圖呼畢勒罕從羣牛中。使曳一壯牛。縛侍僧一人於其尾而鞭之。其牛既蹴所縛之人。復闖然而走。經數日。命搜索之。其人。不特生存。卽身體亦無微傷也。

乾隆三年。第二世哲布尊丹巴呼圖克圖呼畢勒罕。年十六。高宗遵照先例。命理藩院確認為真正之呼圖克圖。賜金印封冊。第二世哲布尊丹巴呼圖克圖既受清之冊封。於庫倫設僧學院。以雲惇綽爾濟喇嘛充主講。宏揚佛法。普濟衆生。四方善男信女。來而供獻者。不絕於途。重修額爾德尼昭。建築宏壯伽藍。行莊嚴之儀式。大受人民之信仰。又以喀爾喀諸王之崇奉。以致風靡全蒙。十五年。棟科爾滿殊習。經於第二世哲布尊丹巴呼圖克圖。以新築哲布尊丹巴與汗阿林南方寺院及其從僧爲獻。因之庫倫哲布尊丹巴呼圖克圖直轄之戶。忽增至千數以上。而其從僧總額。增達三萬人。清廷覩第二世哲布尊丹巴呼圖克圖權力之擴張。蒙人之崇奉。

於十九年高宗詔諭二世哲布尊丹巴呼圖克圖略曰。

哲布尊丹巴呼圖克圖出家僧也。在蒙古爲黃教之長。管理從僧俗事。則不適其任。且亦無暇。今爲管理事務。特設額爾德尼商卓特巴之職於庫倫。而以庫倫之司庫塞臣陀音隆都布多爾濟。執行其職務。但額爾德尼商卓特巴所管轄之從僧事務。唯遵其決議。而承哲布尊丹巴呼圖克圖之認可耳。哲布尊丹巴呼圖克圖不問任何事務。毋庸親身干與。

二世哲布尊丹巴呼圖克圖。乃致全力於宗務之發展。二十年。建學院於庫倫。教授經典奧義。公行試驗。贈給僧位。並制定寺院建築法。及喇嘛之法衣祭禮祝文讚頌等類。

時準噶爾謀叛。遣使抵喀爾喀各部。誘其離中國而獨立。喀爾喀西部諸王。受其煽惑。已振軍興旅矣。高宗聞之。先命駐京章嘉呼圖克圖。致書二世哲布尊丹巴呼圖克圖。請竭力鎮撫喀爾喀地方之人心。二世哲布尊丹巴呼圖克圖答章

嘉呼圖呼圖書曰。勿庸煩心。謂事皆平穩。然喀爾喀之東部。雖屬安穩。而西部仍擾亂也。高宗乃親諭第二世哲布尊丹巴呼圖克圖。略曰。

近者。準酋倡亂。高舉叛旗。天討有日。喀爾喀人誤聽成袞札布之喉使。撤張家口與烏里雅蘇臺間之驛站。斷絕中國與喀爾喀之交通。此事實出於喀爾喀人之輕舉。若速就厥職。執行站驛事務。則不究其罪。爾哲布尊丹巴呼圖克圖。爲喀爾喀各部所共奉之大喇嘛。當派遣年長而有信用之喇嘛。調查事實。諭以不可騷擾之理。

第二世哲布尊丹巴呼圖克圖遵高宗勅命。召集各部王公。曉諭利害。使喀爾喀諸部。仍宗清之正朔。二十年。平定準噶爾。高宗幸熱河之避暑山莊。四衛拉特部落來覲。仿西藏三摩耶廟制。勅建普寧寺。以昭武成。高宗御製普寧寺碑文。賜之。詞曰。

乾隆二十年夏五月。平定準噶爾。冬十月。大宴賚四衛拉特部落。舊附新歸之衆於避暑山莊。曰綽羅斯。曰都爾伯特。曰輝特。曰和碩特。四族台吉各封以汗。

王貝勒貝子公。若而人其無隸屬之宰桑。則歸之公。如內八旗外四十九旗。喀爾喀四部之例。至是而內外一家。遐邇同風之言允符。昔我皇祖之定喀爾喀也。建彙宗寺於多倫諾爾。以一衆志。式循舊章。建普寧寺於山莊之北麓。而爲之記。皇天有輔德之私。至聖有越世之度。君子有見幾之作。兆人有可格之誠。我國家撫有衆蒙古。詎準噶爾一部。終外王化。雖庸衆有威之不知畏。惠之不知懷。地不可耕。民不可臣之言。其然豈其然哉。以我皇祖皇考。聖德神功。經文緯武。其於奠伊犁勒銘格登山。朝四部落之衆。而錫之爵。賜之幣。式宴陳舞。可汗起奉酒稱萬壽。如今日者何難。然契大造。意若有待。是以遵養時晦。垂成弗爲。予小子敬承乾祐。以爲不可失者。時遲徊觀望。寧一聖。付託藐躬之意。且此山莊卽皇祖歲時巡觀諸蒙古賓客之所也。越三十年。而克見準噶爾之衆。咸覲於此。豈非皇天無私。惟德之輔。至聖之度。越世先知。而見幾君子之作。予亦不敢不勉衛拉特之衆。豈終不可格以誠哉。蒙古向敬佛興黃教。故寺

之式。卽依西藏三摩耶廟之式爲之。名之曰普寧者。蓋自是而雪山葱嶺。以西海恆河沙數臣庶。咸欲安其居樂其業。永永普寧云爾。復依普賢世界品而述偈言。

抖贊轉輪王。	功德甚深大。	造寺於西域。	其名三摩耶。	逮今千餘歲。
願海裝嚴就。	肖彼須彌山。	巍閣凡三層。	日月在兩肩。	地金水風輪。
其內小鐵圍。	大鹹海水滿。	持地障礙山。	馬耳及喜見。	擔木並持軸。
持雙凡七山。	其中乃香水。	其上堅手天。	持鬘及恒憍。	四天王所住。
復有四方天。	其數各以八。	中乃忉利天。	善見帝釋宮。	欲界四天子。
色界無色界。	次第居其上。	東曰勝神州。	小勝及勝夕。	左右以次住。
南曰瞻部洲。	妙拂並小拂。	左右以次住。	西曰牛賀洲。	行道將小行。
左右以次住。	北曰俱盧洲。	最勝復詔勝。	左右以次住。	供養佛無數。
如普賢願海。	復爲四色塔。	義出陀羅尼。	四智標功用。	懿此避暑莊。

古佛所游歷。較彼衛藏地。佛上無差別。有來衆蒙古。及新衛拉特。
咸敬黃教人。爰作大利益。肖使三摩耶。爲奉人天師。作此曼陀羅。
嚴潔身口意。依法香泥塗。一切皆清淨。香花俱養具。法螺法音聲。
轉無量法輪。聚無量法衆。誦無量法寶。作無量法事。我聞普賢言。
華藏莊嚴海。是毗盧遮那。徑劫修行處。種種寶光明。大雲徧一切。
捨身等塵刹。以昔願力住。遍十方國土。出苦向菩提。方便是調伏。
世界所有塵。一一見法界。現佛如雲集。此是如來刹。大願周法界。
一切化羣生。莊嚴從此出。西土及震旦。究竟無同異。衆生皆安穩。
暨蠕動肖翹。遂生明佛性。稽首天人師。普賢行如是。

高宗嘉第二世哲布尊丹巴呼圖克圖鎮撫喀爾喀之功。於二十一年十二月
辛未。特降優詔。加封敷教安衆大喇嘛。並賜寶石絹帛。賞乘黃車。二十二年。喀爾喀
天然痘流行。第二世哲布尊丹巴呼圖克圖羅病。於十二月二十七日圓寂。享年三

十有四。其龕座初供於庫倫。三十年。高宗給國幣修建勅願寺以祀之。四十三年。移二世哲布尊丹巴呼圖克圖之舍利塔於勅願寺。

第四節 三世哲布尊丹巴呼圖克圖

二世哲布尊丹巴呼圖克圖入寂之公報。達於北京。理藩院奏聞。高宗鑒於者。使陷於窮困。其部下亦效諸王。組黨樹幟。相嫉之餘。暴行壓虐。無所不至。既慮蒙境之爭。須資鎮撫。又恐哲布尊丹巴呼圖克圖之權力過重。難於懾服。乃於二十三年三月七日。降詔略曰。

喀爾喀哲布尊丹巴呼圖克圖示寂。庫倫之宗務掌管。雖有額爾德尼商卓特巴三都布。然下級從僧之管轄。一名不足。特選喀爾喀理刑官桑齊多爾濟。爲庫倫辦事大臣。使護理庫倫。兼轄從僧。

高宗既下詔喀爾喀。復遣使西藏。令上書清廷。蒙古第三世哲布尊丹巴呼圖克圖

之呼畢勒罕。當轉生於西藏。

時喀爾喀人初接詔書。雖悟哲布尊丹巴呼圖克圖之權。有所減削。然其覬覦之心。並不因之而稍減。仍各遣使北京西藏等處。互相賄賂。及聞清廷有以第三世哲布尊丹巴呼圖克圖之呼畢勒罕出於西藏之意。衆遂大譁。尤欲力爭。庫倫喇嘛更於二十五年。開辦醫校。謂爲繼承第二世哲布尊丹巴呼圖克圖之遺旨。欲保持第三世哲布尊丹巴呼圖克圖呼畢勒罕之仍出於蒙古。土謝圖汗致書於駐京之章嘉呼圖克圖。歷述喀爾喀之布教及服從中國。以第三世哲布尊丹巴呼圖克圖之呼畢勒罕。應在喀爾喀轉生爲要。庫倫喇嘛深以爲然。喀爾喀人於憤激之餘。開會集議。由桑齊多爾濟轉奏清廷。略云。

初。喀爾喀人得哲布尊丹巴呼圖克圖呼畢勒罕轉生於西藏之報。擬以空前盛儀歡迎之。但哲布尊丹巴呼圖克圖佛教之大聖也。爲其信徒者。崇奉之餘。更須施以嚴密之保護。庫倫偏居北蒙。去中國遠。防備全無。夙爲準噶爾所劫。

掠。故以其地駐節呼圖克圖。實非所宜。卽平時安寧之日。寺中雜居婦人商賈。是豈聖人修法之地哉。爲呼圖克圖計。不若移駐多倫諾爾爲得策。旣得朝廷保護而免危急。且住居於離市邃遠之寺。尤便唵經也。前者哲布尊丹巴呼圖克圖關於喀爾喀諸王之政事。例有主裁之權。今且勿論矣。前輩哲布尊丹巴呼圖克圖之費用。由其從僧徵收貢稅。此法不妥。建議由清廷支給哲布尊丹巴呼圖克圖薪俸。使從僧與其他平民。服公共賦役。

奏上。高宗諭略曰。

歡迎哲布尊丹巴呼圖克圖之呼畢勒罕。理固宜然。然不可因此而重人民之負擔。移哲布尊丹巴呼圖克圖呼畢勒罕於多倫諾爾。恐失喀爾喀人信仰之心。以駐錫庫倫爲便。但須遠離婦人商賈爲宜。哲布尊丹巴呼圖克圖爲佛教之主。支給國款。於理不適。課從僧之稅於國家。全爲無益。徒使哲布尊丹巴呼圖克圖垂皇室寵愛之印。所有從僧情況。裁定爲當如從來。

四部僧衆。得此覆救。大失所望。然喀爾喀人並不因此而滅其志。尙希呼畢勒罕圓寂之後。再爲設法。使其轉生於喀爾喀。

第三世哲布尊丹巴呼圖克圖呼畢勒罕。在西藏之立湯轉世。初呼畢勒罕之父名丹津滾布。爲西藏之立湯及加母州領主。參詣第七世達賴喇嘛。第七世達賴喇嘛勸丹津滾布娶當時西藏噶布倫德龍齊之女爲妻。丹津滾布從之。婚儀旣終。自拉薩歸立湯。二人每夜皆得吉夢。天空現虹。光耀燦爛。乾隆二十三年十月一日黎明。第三世哲布尊丹巴呼圖克圖之呼畢勒罕降生焉。越五月而不言。然有如嗒經之風。不喜坐毛氈。常倚高椅。以手作降福於人民之勢。見者皆曰。此子非凡。當大喇嘛也。旣越五月。依例須穿青色襯衣。奇哉。從來一言不發之幼孩。俄而叫曰。我不纏俗人之服裝。衆皆驚異。穿以黃色之喇嘛衣。西藏喇嘛旣見如斯之奇瑞異兆。益信第三世哲布尊丹巴呼圖克圖之呼畢勒罕。當出於西藏。卽遵旨以丹津滾布之子。爲喀爾喀之第三世哲布尊丹巴呼圖克圖之呼畢勒罕焉。

二十八年。清廷勅諭遣使西藏。迎三世哲布尊丹巴呼圖克圖呼畢勒罕至庫倫。喀爾喀各部奉勅。謹於札薩克圖汗部之巴爾達札。土謝圖汗部巴圖爾貝勒車布登。加以護送。途經青海。近三音諾顏部時。齊牙庫茲耳貝子出迎。呈曼陀羅。道經熱河。適高宗亦駐節於此。遂晉謁。高宗每問。三世哲布尊丹巴呼圖克圖呼畢勒罕。輒以純粹之蒙古語答之。衆大奇之。此卽三世哲布尊丹巴呼圖克圖呼畢勒罕之前世。轉生於蒙古之確証也。勅命章嘉呼圖克圖。授以小戒。章嘉呼圖克圖與三世哲布尊丹巴呼圖克圖呼畢勒罕晤面。初叙幼童之禮。次叙克茲立。終授牙曼塔加音王之位。取名伊什丹巴尼瑪。三世哲布尊丹巴呼圖克圖呼畢勒罕既謁高宗受法戒。賜乘黃車。自多倫諾爾赴庫倫坐床。當行禮時。三世哲布尊丹巴呼圖克圖呼畢勒罕之相。現於手中。是年五月三十日。詔諭曰。

庫倫哲布尊丹巴呼圖克圖年幼。不能管理政治從僧之事務。茲做西藏拉薩駐藏大臣。處決達賴喇嘛事務之例。以庫倫之辦事大臣。處理哲布尊丹巴呼

圖克圖之事務。

三十年八月丁巳。高宗諭內閣曰。

朕爲闡揚黃教。安輯衆生。特降諭旨。將哲布尊丹巴呼圖克圖之呼畢勒罕。由西藏接來。哲布尊丹巴呼圖克圖乃喀爾喀等供養之大喇嘛。今方年幼。正宜勤學經典。不可無教習之喇嘛。但堪布諾們罕札木巴勒多爾濟。商卓特巴遜。都布多爾濟。及堪布喇嘛沙克都爾等。昨據阿里袞瑚圖靈阿參奏。亦曾請給票照。私向俄羅斯貿易。並據成袞札布奏。諾木布札木巴勒多爾濟等有擅欺小呼圖克圖一事。經阿里袞訊問。雖互相推諉。不肯吐實。然仍留於呼畢勒罕之側。甚屬無益。俱令來京。其普寧寺堪布喇嘛羅布藏札木巴拉。亦由西藏喚來。通徹經典。今特賞諾們罕名號。遣往庫倫爲哲布尊丹巴呼圖克圖之教習。務俾呼畢勒罕勤學經典。慎守戒律。副朕闡揚黃教之至意。而喀爾喀等亦有厚望焉。勉之勿怠。將此並諭喀爾喀四部落知之。

是年。高宗御建之勅願寺。行竣工禮。以祀第二世哲布尊丹巴呼圖克圖。三十一年。勅建普樂寺於熱河。御書寺額。御製普樂寺碑記賜之。其詞曰。

避暑山莊。當興桓隩區直北。地亘獅溝西南。官廡民廬。聚落殷美。獨其東偏列嶂。邈綿周原。案衍則諸經所稱。廣長清淨。於佛土宜。乾隆乙亥。西陲大功告成。衛拉特各部長來會時。嘗肖西域三摩耶。建寺曰普寧。嗣是達什達瓦屬人內徒。卽次旅居。環匝山麓。越歲乙酉。復於迤左。仿伊犁固爾札都綱。建廟曰安遠。然自廟南。延望錘峯。式壘式閼。厥壤猶隙。惟大濛之俗。素尙黃教。將欲因其教。不易其俗。緣初構而踵成之。且每歲山莊秋巡。內外札薩克觀光以來者。肩摩踵接。而新附之都爾伯特及左右哈薩克。東西布魯特。亦宜有以遂其仰瞻。興其肅恭。俾滿所欲。無二心焉。咨之章嘉國師云。大藏所載。有上樂王佛。乃持輪王佛化身。常居東嚮。洪濟羣品。必若外關重闔。疏三塗中翼廣殿。後規闔。城內疊磴。懸折而上。置龕正與峯對者。則人天咸遂皈依。將作如制。以丙戌正月經

始。泊丁亥八月訖工。爰取普樂顏寺額。而爲之記曰。自西人之瀕於塗炭也。湫隘阡危。不能終日。朕則爲之求寧焉。既寧之後。奔走偕來。室家還定。朕則爲之計安焉。既寧且安。其樂斯在。譬如佛影。覆於鷁身。四大得欣。離怖思想。生歡喜心。慚自剎那。以逮億劫。同遊春臺化宇。樂其樂而不能名其樂。眞上樂耳。雖然。曷易臻此哉。語曰。民可與樂成。難與慮始。又曰。先天下之憂而憂。後天下之樂而樂。是朕所由繼普寧安遠。而命之爲普樂者。既以自慰。且重以自勗。而匪直梵文勝因福利之云云也。記成并系以讚。

善哉大能仁。無去亦無住。以何因緣故。現在說法身。人天咸護持。
功德甚稀有。云何稱上樂。自小千中千。暨三千大千。法界無究竟。
爾時兩足尊。甘露爲灌頂。一切諸衆生。若有情無情。念彼佛力者。
受持陀羅尼。三世諸如來。神力並加汝。第一具根性。卽身得証佛。
其次小乘人。得八大成就。靈丹淨眼方。徹地智慧劍。空行遍周歷。

延年無疾病。自洛义俱抵。無量僧祇劫。萬行齊完滿。求福不唐捐。
普衆福德田。普蔭如意樹。普覆大慈雲。普渡大願船。震旦闍浮提。
清寧共安隱。而彼狼荒俗。永脫修羅天。合十白佛言。此是法王力。
要知大自在。本分元自足。無苦彊言樂。卽墮分別相。樂古無名。
上亦無等等。東風開妙鬢。寶閣照旭光。舉似日出處。了了正知見。
光與日無盡。誰識所本來。八寶莊嚴成。香華天樂備。大會起無遮。
開証無上道。

三十二年。設大喇嘛之職於庫倫之額爾德尼商卓特巴衙門。三十五年。舊藩新附。溥慶臚歡。命倣西藏布達拉都綱法式。創建新寺。高宗御書額曰普陀宗乘之廟。御製普陀宗乘之廟碑賜之。其詞曰。

山莊迤北普陀宗乘之廟之建。仿西藏非仿南海也。南海普陀在浙江定海縣境。朝山之泊。歲歲凌越。洪濤瀾澗間。擎香頂禮唯謹。曰大士道場。舍茲奚屬。是

獨震旦緇流方隅所見故。然考之貝夾。普陀有三。一居額納特珂克。一居圖伯特。一居南海。蓋南海特大。士行教至此。偶一示現云耳。庸可以此爲是。而彼爲非乎。額納特珂克卽印度是。由此以証西來因緣。自印度而西藏。自西藏而南海。了了可識。第印度金剛座遼遠難稽。詎若西藏都綱法式具備。爲天人攝受之閔規。藩服皈依之總匯也哉。乃者歲庚寅。爲朕六袞慶辰。辛卯恭遇 聖母皇太后八旬萬壽。自舊隸蒙古喀爾喀青海王公台吉等暨新附準部回城衆番長。聯軫偕徠。臚歡祝嘏。念所以昭褒答示惠懷者。前期咨將作營構斯廟。以乾隆三十二年三月經始。至三十六年八月訖工。廣殿重臺。窮亭翼廡。爰逮陶范。斤鑿金碧。髹堊之用。莫不嚴淨如制。夫羣藩信心廻向。厥惟大慈氏之教。而熱河尤我 皇祖聖祖仁皇帝。撫綏列服。歲時四覲之區。嚮也西陲內面景從。朕勤思纘述。普寧安遠。普樂諸刹所爲。嗣溥仁溥善而作也。今也逢國大慶。延洪曼羨。而斯廟聿成。三乘之宗。實其統會。於焉宣室。鐸金輪關禽流。梵樂之

音塞。樹種菩提之果。一切國土善信。膜拜歡喜。以爲得未曾有。而久入俄羅斯之土爾扈特。以其爲外道。非黃敎所概。舍久牧之額濟勒。率全部數萬人。歷半年餘。行萬有數千里。傾心歸順。適於是時。莅止瞻仰。善因福果。誠有不可思議者。是則山莊之普陀。與西藏之普陀。一如與印度之普陀。亦一如與南海之普陀。亦可必不一如。然一推溯夫建廟所由來。而如不如。又均可毋論。卽如如之本義。豈外是乎。豈外是乎。先是。群藩合辭請進千佛像。懇款弗可卻。因命就廟中皮閣奉之。別有記。不復詳。綴爲說偈曰。

我聞瞻部州。古德有道場。天龍各護持。名四大結聚。九華及二歲。

五臺亦初地。普陀南海南。觀自在所在。其言限方所。不出邊邪見。

譬如一傑手。味萬億由旬。若人証三摩。要令不失故。衛藏妙莊嚴。

竺乾祖庭意。興桓足香界。成此大勝因。百部諸賢王。合十聆頌讚。

塞土黃金色。是處菩薩面。其前羅漢峯。磬石爲捷推。舉似象王巖。

非離亦非卽。其下獅子溝。武列功德水。舉似鐵蓮洋。無垢亦無淨。能具等正覺。皆作如是觀。五十三參竟。還叩兩足尊。長現調御相。爲說無生法。

三十八年秋。第三世哲布尊丹巴呼圖克圖示寂於庫倫之宮殿。享年一十有六。其龕座供於庫倫之甘丹寺。

第五節 第四世哲布尊丹巴呼圖克圖

第三世哲布尊丹巴呼圖克圖。既圓寂於庫倫。喀爾喀人希望第四世哲布尊丹巴呼圖克圖之呼畢勒罕。轉生於喀爾喀之念復起。適土謝圖汗之福晉懷孕。衆皆認爲第四世哲布尊丹巴呼圖克圖之呼畢勒罕。彌月竟生一女。因之庫倫哲布尊丹巴呼圖克圖呼畢勒罕轉生於喀爾喀之志遂絕。世世降生於西藏矣。

庫倫辦事大臣。於第三世哲布尊丹巴呼圖克圖入寂之時。卽飛報北京。清廷發勅令至藏。使指定第四世哲布尊丹巴呼圖克圖之呼畢勒罕。三十九年。喀爾喀

遣使入藏。翌年。抵拉薩。晉謁第八世達賴喇嘛。述三世哲布尊丹巴呼圖克圖入寂之事。並請指定第四世哲布尊丹巴呼圖克圖之呼畢勒罕。第八世達賴喇嘛選定索諾木達什之子爲第四世哲布尊丹巴呼圖克圖之呼畢勒罕。索諾木達什爲第八世達賴喇嘛之伯父。則第四世哲布尊丹巴呼圖克圖呼畢勒罕。爲第八世達賴喇嘛之從兄弟也。生五歲。於四十三年。在布達拉受戒。取名羅卜藏圖巴坦旺舒克。越三年。自拉薩移居庫倫。就法座。高宗依例賜給如前世哲布尊丹巴呼圖克圖呼畢勒罕特典之外。賞乘黃輿。晉封第四世哲布尊丹巴呼圖克圖呼畢勒罕之父。索諾木達什爲公爵。未幾。索諾木達什病卒於庫倫。乃由第四世哲布尊丹巴呼圖克圖呼畢勒罕之弟刺木坦納木札勒襲焉。

及長。勵精宗務。親喇嘛輩之懶惰偷安。使之修學。有不從者。以棒罰之。五十五年。設僧學院及醫學院外。更建星學院。五十六年。已達成年。因赴熱河。於七月乙酉。晉謁高宗於避暑山莊。戊戌。高宗御萬樹園賜宴。厚賞而歸。墨爾根諾們罕齊旺多

爾濟。修建蒲拉伊噴寺於喀爾喀。爲此行之紀念。六十年。以庫倫額爾德尼商卓特巴之請。再謁高宗於熱河之山莊。賜給前世哲布尊丹巴呼圖克圖之各種特典。及歸庫倫。乃注全力布教。自西藏求多數之佛像納於寺焉。

乾隆晚年。高宗以蒙古呼圖克圖類多兄弟叔姪相承。且多出蒙古汗王貝勒子弟。乃乘用兵西藏之後。創金本巴瓶二。一置西藏之大昭。以供西藏呼圖克圖之掣定。庫倫哲布尊丹巴呼圖克圖亦於此瓶掣定。他一置北京之雍和宮。凡蒙古所奉之呼圖克圖。其呼畢勒罕將出世。則報名理藩院。互報差異者納籤瓶中。誦經降神。理藩院與駐京之章嘉呼圖克圖掣之。高宗既革其弊。乃御製喇嘛說。立漢滿蒙藏四體碑於北京之雍和宮。詞曰。

佛法始自天竺。東流自至西蕃。其蕃僧又相傳稱爲喇嘛。喇嘛之字。漢書不載。元明史中。或訛書爲刺馬。予細思其義。蓋西番語謂上曰喇。謂無曰嘛。喇嘛者。謂無上。卽漢語稱僧爲上人之意耳。喇嘛又稱黃教。蓋自西番高僧帕克巴。始

盛於元。沿及於明。封帝師國師者皆有之。我朝惟康熙年間祇封一章嘉國師。相襲至今。其達賴喇嘛班禪額爾德尼之號。不過沿元明之舊。換其襲勅耳。蓋中外黃教總司以此二人。各部蒙古。一心歸之。興黃教卽所以安衆蒙古。所繫非小。故不可不保護之。而非若元朝之曲庇諂敬番僧也。其呼圖克圖之相襲。乃以僧家無子授之。徒與子無異。故必覓一聰慧有福相者。俾爲呼畢勒罕。幼而習之。長成乃稱呼圖克圖。此亦無可如何中之權巧方便耳。其來已久。不可殫述。孰意近世。其風日下。所生之呼畢勒罕。率出一族。斯則與世襲爵祿無異。予意以爲大不然。蓋佛本無生。豈有轉世。但使今無轉世之呼圖克圖。則數萬番僧。無所皈依。不得不如此耳。去歲廓爾喀之聽沙瑪爾巴之語。劫掠藏地。已其明驗。雖興兵進剿。彼卽畏罪請降。藏地以安。然轉生之呼畢勒罕出於一族。是乃爲私。佛豈有私。故不可不禁。茲予製一金瓶。送往西藏。於凡轉世之呼畢勒罕。衆所舉數人。各書其名置瓶中。掣籤以定。雖不能盡去其弊。較之從前一

人之授意者。或略公矣。夫定其事之是非者。必習其事。而又明其理。然後可。予若不習梵經。不能爲此言。始習之時。或有議爲過興黃教者。使予徒泥沙汰之虛譽。則今之新舊蒙古。畏威懷德。太平數十年可得乎。且後藏煽亂之喇嘛。卽正以法。元朝曾有是乎。蓋舉大事者。必有其時與其會。而更在乎公與明。時會至而無公與明以斷之。不能也。有公明之斷。而非其時與會。亦望洋而不能成。茲之降廓爾喀。定呼畢勒罕。適逢時會。不動聲色以成之。去轉生一族之私。合內外蒙古之願。當耄近歸政之年。復成此事。輯藏安邊。定國家清平之基於永久。予幸在茲。予敬益在茲矣。

乾隆五十有七年。歲次壬子孟冬月之上澣。御筆。

嘉慶二年。第四世哲布尊丹巴呼圖克圖。參詣慶寧寺。棲於寺北之布拉浪寺。喀爾喀之諾顏等部。例當來此貢獻。既見佛典與可資僧衆研究之經卷之缺乏。命寺僧謄寫之。七年。再赴執河。建八塔焉。八年赴西藏。途次參詣額爾德尼昭。喀爾喀

之四部。均來貢獻。既抵西藏。於九年四月十五日。在布達拉受第八世達賴喇嘛之戒。是年冬。自西藏携帶多數之佛像經典歸喀爾喀。其所請來之釋迦牟尼佛像。供奉於庫倫之大伽藍。十三年。在奔巴圖修建下特達布林禪寺。供養禪僧。是年秋。參詣慶寧寺。受喀爾喀人之貢獻。十四年元旦。參詣親建之下特達布林禪寺。是年春。以茲安特喇嘛之請。建築特殊之茲安特寺。作爲庫倫康湯特區之起因。夏末竣工。因管理五萬之從僧事。赴熱河晉謁仁宗。與之磋商善後。十六年。發布新例。略云。

會盟副長之權利。與額爾德尼商卓特巴之權利相等。任斯職者。朝廷給予特殊之訓令及冊印。兼可利用額爾德尼商卓特巴之尊號。

十七年。第四世哲布尊丹巴呼圖克圖赴北京。參詣諸寺。是年冬。有病尋愈。在北京之內廷迎春。翌年春。歸喀爾喀。途次詣五臺山。病復發。自五臺歸。途入寂。享年四十。仁宗得報。於第四世哲布尊丹巴呼圖克圖之靈前。賞賜曼陀羅。又命喀爾喀札薩克圖汗與布達拉札薩克喇嘛。送龕座於蒙古。二十一年。經驛站迎至慶寧寺。至今

尙供於其寺之特殊室焉。

第六節 第五世哲布尊丹巴呼圖克圖

庫倫第四世哲布尊丹巴呼圖克圖圓寂。西藏第七世班禪額爾德尼聞報。選擇第四世哲布尊丹巴呼圖克圖圓寂後十個月內所產之赤孩十二人。致布達拉。拓去不現佛相者。終餘三人。乃集合第七世班禪額爾德尼及駐藏大臣。以紙片三。用漢滿蒙藏四體字。錄赤孩之名。投於頒發大昭之金本巴瓶中。誦經之後。夾取其一。當時所掣得之第五世哲布尊丹巴呼圖克圖之呼畢勒罕。係袞布惇多布之子。駐藏大臣上奏清廷。仁宗詔諭庫倫之額爾德尼商卓特巴。命將第五世哲布尊丹巴呼圖克圖呼畢勒罕之掣定。轉諭喀爾喀人。喀爾喀人乃集議籌款。迎回庫倫。其赴西藏歡迎哲布尊丹巴呼圖克圖呼畢勒罕之衆。舊制以王一人爲之長。自各部落貝勒貝子公或札薩克台吉中。任選二人。達賴喇嘛與班禪額爾德尼之堪布喇嘛等加入之。此外與於此行者。有理刑官嚮導牧夫厨夫爐夫工徒。一行之數愈千。

需駱駝千餘。清廷遣使一人。自西藏護送喀爾喀。及抵庫倫。回京覆旨。庫倫使節出發時。先於三月前布告人民。屆期。舉行嚴重之送別禮。各寺誦經。各官送別。行衆於春季出發。先經土謝圖汗與三音諾顏汗之游牧地。次經阿拉善王旗。至多倫諾爾。翌年春。抵拉薩。拉薩人民。時前妥爲準備一切。行衆既到。呈送贈品。請先授哲布尊丹巴呼圖克圖呼畢勒罕小戒。迎回庫倫。就道時。西藏人民。送之境上。以壯其行。沿途例有清兵護送。至喀爾喀境。則額爾德尼商卓特巴喇嘛諸王人民。須出迎之。獻哈達。至庫倫。不徑赴宮殿。通例住於甘丹附近。卜吉日。乘黃轎入庫倫。最初於茲臥庫欽授金印金冊。並獻丹斯庫。此後深居宮殿。有喇嘛監護之。諾們罕喇嘛教以經典。人民鮮見。

第五世哲布尊丹巴呼圖克圖。嘉慶二十年春。轉世於素封之袞布惇多布之家。名羅卜藏茲臥耳達母西庫墨特。第七世班禪額爾德尼掣定爲第五世哲布尊丹巴呼圖克圖呼畢勒罕後。仁宗賜之黃帶帳幕。二十四年。在布達拉受第七世班

禪額爾德尼之小戒。翌年一月九日。第五世哲布尊丹巴呼圖克圖呼畢勒罕迎入庫倫。勅賜金冊金印。宣宗卽位。於道光元年七月五日。特賜詔勅。公認第五世哲布尊丹巴呼圖克圖呼畢勒罕之特典。呼畢勒罕乃獻九白之貢於宣宗焉。在庫倫坐牀三年。第五世哲布尊丹巴呼圖克圖呼畢勒罕擬入朝晉謁。由庫倫辦事長官雲惇多爾濟。於四年轉奏清廷。宣宗諭略曰。

哲布尊丹巴呼圖克圖之忠順欲謁朕。朕甚嘉之。然哲布尊丹巴呼圖克圖呼畢勒罕。今尙年幼。正研究經典之時。可勿庸來京及熱河。將來待勅命下時。喇嘛伴呼圖克圖來謁可也。今贈哲布尊丹巴呼圖克圖哈達。托雲惇多爾濟授之。以傳朕意。

時清廷覩喀爾喀人之柔順。優待哲布尊丹巴呼圖克圖之禮意。隨之而衰。並其來朝而阻之。十四年。庫倫第五世哲布尊丹巴呼圖克圖呼畢勒罕。赴西藏拉薩。晉謁第七世班禪額爾德尼。受格倫小戒。並請第七世班禪額爾德尼轉奏清廷。願入京

朝覲及張蓋黃幕等事。清廷因蒙藏各處有職喇嘛輩。請求特典之頻繁。特制總則而公布之。並勅諭第五世哲布尊丹巴呼圖克圖呼畢勒罕曰。

哲布尊丹巴呼圖克圖。許住黃幕。乘黃輿。入京覲觀。特應其請。但費用須自備。隨行者務宜少數。並禁止苦課蒙古俗人之稅。

十五年六月十一日。第五世哲布尊丹巴呼圖克圖。發庫倫赴西藏。晉謁第七世班禪額爾德尼。受克倫大戒。十六年歸庫倫。憂內地商人多蝟集於其寺。於是奏請清廷。別築宮殿於甘丹。勅許之。殿側廣建場所。設僧學院。爲喇嘛研究經典之需。十九年。第五世哲布尊丹巴呼圖克圖擬晉京參謁。由庫倫辦事長官德勒克多爾濟轉奏。復旨允許。乃於十一月下旬。赴北京。二十年元月十五日。係清廷頒賞羣臣之例日。特賜第五世哲布尊丹巴呼圖克圖黃輿及輿旗。北返喀爾喀。擬再赴西藏。因疾暫止。二十二年。圓寂於庫倫之康湯。享年二十有八。龕座供於庫倫之甘丹寺。

第六世哲布尊丹巴呼圖克圖呼畢勒罕。於道光二十二年冬。轉生於西藏。係牧驢者之子。庫倫使節赴拉薩歡迎第七世班禪額爾德尼籤掣第六世哲布尊丹巴呼圖克圖呼畢勒罕時。途中遭遇盜劫。以是喀爾喀人請於清廷。使第六世哲布尊丹巴呼圖克圖呼畢勒罕由藏迎入庫倫之一行。擬由拉薩假道四川。宣宗於二十八年二月二十七日。諭詔略曰。

哲布尊丹巴呼圖克圖。爲喀爾喀闡揚黃教之主。今由藏入庫倫。朕聞之甚喜。擬假道內地。本不足論。惟近因川省歲饑民貧。迎接呼圖克圖之隨從又衆。深恐難於周濟。特此曉諭。着毋庸議。

喀爾喀人迎第六世哲布尊丹巴呼圖克圖呼畢勒罕之赴西藏者。總數將達五千人。需費綜計十五萬金。歸途經厄魯特游牧地。又遇盜。竟遭二次之劫掠。損失器物駝馬無算。第六世哲布尊丹巴呼圖克圖呼畢勒罕既入庫倫坐牀。僅五十九日。卽罹天然痘而圓寂。享壽七歲。龕座供於丹巴多爾濟寺。

第八節 第七世哲布尊丹巴呼圖克圖

第七世哲布尊丹巴呼圖克圖呼畢勒罕。於道光三十年。在拉薩附近轉世。西藏俗人米穀瑪耳之子也。咸豐元年。第七世班禪額爾德尼掣定之。四年。從加爾滾寺之綽爾濟喇嘛受小戒。取名架伊茲蒲丹占。五年。迎入庫倫坐牀。第七世哲布尊丹巴呼圖克圖呼畢勒罕幼時。立志修學。至十二歲。專究經典。精修戒律。蒙古佛教。日見繁榮。於是有魔焉。以曷聖教之闡揚。豈得已哉。

同治二年。車臣汗阿耳塔西茲達。任庫倫辦事大臣。爲人放蕩不經。多蓄姬妾。自就庫倫辦事大臣職後。驕奢傲逸。公行賄賂。因自旗所入。不敷其需。欲動用哲布尊丹巴呼圖克圖之金庫。乃使其二子侍第七世哲布尊丹巴呼圖克圖呼畢勒罕。諂媚追隨。以迎合之。不二年。其次子受僧戒者。一躍而爲達喇嘛之職。此乃額爾德尼商卓特巴衙署中管理從僧之官。不究宗務。唯以諂媚爲事。其長子則勸第七世哲布尊丹巴呼圖克圖呼畢勒罕狩獵。緣此二魔之引誘。使第七世哲布尊丹巴呼

圖克圖呼畢勒罕。自四年間。每日均在郊外。從事佃獵。畢則駐於郊外之宮殿。張盛宴。嗜酒煙。宗務各事。無所顧問矣。

庫倫喇嘛。親第七世哲布尊丹巴呼圖克圖呼畢勒罕。受羣魔之包圍。欲借庫倫辦事大臣之力以制之。乃於五年冬。由庫倫辦事大臣公署發布一令。略云。苟爲喇嘛。其行爲有與爲僧之身格不相應者。當受裁判所之處罰。羣魔聞令。如鳥獸散。六年春。第七世哲布尊丹巴呼圖克圖呼畢勒罕參詣慶寧寺。及返庫倫。土謝圖汗部達親王之子。車臣汗部岱親郡王之子。車臣汗之二子等羣魔。復肆妖術。各處喇嘛。大爲激昂。乃集議於庫倫。爲檄文而聲討之。終使羣魔放逐於各地。七年春。第七世哲布尊丹巴呼圖克圖呼畢勒罕。因受羣魔之侵襲。氣力漸衰。後稍愈。夏。接見崇拜者。八月。臨土音德倫河。修那伊那達母之例祭。歸途病發。十二月十四日午後三時入寂。享年一十九歲。龕座供於庫倫之甘丹寺。

第九節 第八世哲布尊丹巴呼圖克圖

第七世哲布尊丹巴呼圖克圖之入寂也。天現二虹。一向東南。一向西南。因虹之分向。使第八世哲布尊丹巴呼圖克圖呼畢勒罕之轉生。有二說焉。甲謂第八世哲布尊丹巴呼圖克圖呼畢勒罕。當再轉生於西藏。乙謂第八世哲布尊丹巴呼圖克圖呼畢勒罕。當轉生於蒙古之東南。主第八世哲布尊丹巴呼圖克圖呼畢勒罕轉生於蒙古者。謂庫倫喇嘛及喀爾喀諸王。屢請第七世哲布尊丹巴呼圖克圖呼畢勒罕赴西藏受戒。呼畢勒罕峻拒之。且明言。我決不赴西藏。此種峻拒。係蒙古之哲布尊丹巴呼圖克圖。不願隸屬於西藏。並爲不願轉生於西藏之証。至喀爾喀諸王及有司。則公言哲布尊丹巴呼圖克圖呼畢勒罕。若轉生於蒙古東部。則西部蒙古人將生不平。縱不爲分裂之端。而情誼之交惡。勢所難免也。故以轉生於西藏。而請達賴喇嘛主之者爲優。遂於同治八年。遣使入藏。請掣定第八世哲布尊丹巴呼圖克圖呼畢勒罕。九年。抵拉薩。時穆宗已詔諭第十二世達賴喇嘛。容喀爾喀人之請。命之掣定第八世哲布尊丹巴呼圖克圖之呼畢勒罕。

第八世哲布尊丹巴呼圖克圖呼畢勒罕。於同治九年春轉世於第十二世達賴喇嘛之一近侍家中。喀爾喀使節得第十二世達賴喇嘛之指掣。遂歸報喀爾喀。擬遣使節迎歸庫倫。適喀爾喀受東干人之襲。大肆劫掠。家畜死斃之厄踵起。延至十二年二月八日。喀爾喀始遣使節發庫倫。十三年。達拉薩。五月就歸途。十月二十日。迎第八世哲布尊丹巴呼圖克圖呼畢勒罕抵庫倫。昇法座。其父母兄弟與之偕來。穆宗賜其父頂戴。光緒八年春。第八世哲布尊丹巴呼圖克圖呼畢勒罕之父卒。其母遂與四子別居他處。而時訪問之。其母西藏人。貞潔賢明。第八世哲布尊丹巴呼圖克圖呼畢勒罕。受其感化者不尠。十一年。居於圖拉河畔之夏殿。十三年。至額爾德尼昭。翌年。欲參詣慶寧寺。適德宗舉行大婚。須貢祝文禮物。並由西藏之第十三世達賴喇嘛爲首。遣使北京。及夏季值大祭典。十五年。詣慶寧寺。得清廷勅許。嗣後修習經典。深居鮮出。

清初諸帝優待庫倫哲布尊丹巴呼圖克圖。褒賞禮遇。無所不至。降及中葉。禮

儀漸衰。道光二十年以後。歷世哲布尊丹巴呼圖克圖。從未得見清帝。光緒四年。竟修訂長官從來普謁哲布尊丹巴呼圖克圖之禮式。宣統二年。清廷因西藏第十三世達賴喇嘛。附英圖叛。降旨革除名號。閣抄到庫倫時。第八世哲布尊丹巴呼圖克圖以下。莫不危懼。皆謂權力如達賴喇嘛者。國家待之。尙且如此。若對於哲布尊丹巴呼圖克圖。更當如何。頓現疑懼憂憤之况。是時第八世哲布尊丹巴呼圖克圖駐節之河灘廟內。裝置兵備。以防不時。慈悲之境。易爲屠場。三年六月十五日。外蒙親王杭達多爾濟等。借會盟爲名。調集四盟王公。秘議獨立之事。奉第八世哲布尊丹巴呼圖克圖爲主。九月。杭達多爾濟秘赴俄京。自稱爲哲布尊丹巴呼圖克圖欽命之外部大臣。晉謁俄皇。貢金佛名馬。請兵援助。三年八月十九日。武昌事起。至九月間。信息傳入庫倫。十月初十日。庫倫辦事大臣衙門忽接四盟王公呈文一件。文曰。現聞內地各省。相繼獨立。革命黨人。已帶兵。取道張家口來庫。希圖擾亂蒙疆。我喀爾喀四部蒙衆。受大清恩惠二百餘年。不忍坐視。我佛哲布尊丹巴呼圖

克圖已傳檄徵調四盟騎兵四千名。進京保護大清皇帝。請卽日按照人數。發給糧餉槍械。以便啟行。是否照准。限本日三小時內。明白批示。

是晚七時。復接第八世哲布尊丹巴呼圖克圖札飭一件。文曰。

爲札飭事。照得我蒙古自康熙年間。隸入版圖。所受歷朝恩遇。不爲不厚。乃近年以來。滿洲官員。對於我蒙古。欺凌虐待。言之痛心。今內地各省。旣皆相繼獨立。脫離滿洲。我蒙古爲保護土地宗教起見。亦應宣布獨立。以明萬全。現已由四盟公推本哲布尊丹巴呼圖克圖爲大蒙古獨立國大皇帝。不日卽當御極。庫倫地方。已無需用中國官員之處。自應卽時全數驅逐。以杜後患。合行札飭三多。札到。該三多卽便凜遵。限三日內。帶同文武官員。暨馬步兵隊等。趕速出境。不准逗留。如敢故違。卽以兵力押解回籍。此飭。

庫倫辦事大臣三多。遂於十月十五日。轉道西伯利亞返國。第八世哲布尊丹巴呼圖克圖已於十月初九日。行登極禮。同其妻額爾多尼蒞北廟受賀。冠蒜瓣黃冠。御

繡龍黃袍。蒞黃幄。登寶座。宣布獨立。稱大蒙古國。以共戴爲年號。文武官員均服蟒。卽組織自治外蒙官府。民國元年二月。共和告成。大局粗定。總統袁世凱。致電庫倫。勸告第八世哲布尊丹巴呼圖克圖文曰。

外蒙同爲中華民族。數百年來儼如一家。現在時局阨危。邊事日棘。萬無可分理。貴喇嘛慈愛衆生。宅心公溥。用特詳述利害。以免誤會。各洲獨立之國。必其人民財賦兵力政治。皆足自存。乃可成一國。而不爲外人所吞噬。蒙古地面雖廣。人數過少。合全蒙計之。尙不如內地一小省之數。以蒙民生計窘迫。財賦所入至微。外蒙壯丁。日求一飽。尙不可得。今乃欲責令出設官養兵購械諸費。不背叛則填溝壑。何所取給。若借之於人。則太阿倒持。必至喧賓奪主。又自奉黃教以來。好生忌殺。已成天性。各部壯丁。祇知騎射。刀矛尙不能備。何論槍礮。欲議攻戰。必無可持。政治則沿貴族之制。行政司法以較各洲強國。萬無可企。更難自立。且各蒙並未盡能服從。貴喇嘛號令所及者。僅圖車賽音三部。且聞尙

未盡服。閱時稍久。人怨財匱。大眾離心。雖悔何及。試問百年以來。凡近於蒙古而不隸中國之蒙回各部。有一自存否。有不爲人郡縣者否。各蒙與漢境。唇齒相依。猶堂奧之於庭戶。合則兩利。離則兩傷。今論全國力量。足以化外蒙之貧弱爲富強。置於安全之域。舊日糝政。當此新基創始。自必力爲掃除。此外若有要求。但能取消獨立。皆可商酌。貴喇嘛識見通達。必能審擇禍福。切勿惑於邪說。貽外蒙無窮之禍。竭情致告。卽希見覆。

旋得第八世哲布尊丹巴呼圖克圖覆電。文曰。

頃承電示。諒諒告誡。感愧莫名。客冬外蒙以時勢危迫。宣告獨立。本推尊哲布尊丹巴呼圖克圖爲蒙古國君王。不得已俯順輿情。已允其請。布告中外。良用歉然。此次倡義。本爲保種保教保全領土起見。並非別有希冀。亦非惑於邪說。實困於虐政耳。所謂外蒙人數過少。貧弱已極。並不知兵。難屬立國。均屬實情。足徵大總統策畫至遠。轉危爲安。秦鏡高懸。無微不至。至禍福利害。惟仰貴大

總統曲體與否。儻荷玉成。俾資勤修內政。敦睦邦交。妥籌邊防。鞏固國基。則不惟外蒙得以保全。卽中國亦無北顧之憂矣。本哲布尊丹巴生雖不敏。亦知處鄰之道。敦在樂天畏天。言念及此。殊深翹企。如云殺人盈城。盈野。率土地而食人肉。仁者不爲。文明大國。亦不忍言此。外蒙僻處絕域。逼近強鄰。勢如累卵。四皆強霸。儻有不虞。必爲台灣朝鮮之續。中國遠隔海隅。鞭長莫及。軍民雖衆。恐將無所用之。外蒙間於列強。進退維谷。苟不獨立。何以自存。本哲布尊丹巴呼圖克圖之獨立自主。係在清帝辭政以前。業經布告中外。起滅何能自由。必欲如此。請卽商之鄰邦。杜絕異議。方合時勢。外蒙之存亡。在公之操縱。操之過急。不潰卽溢。則無異於爲業驅爵。尙希廣發佛心。大施汲引。玉成此舉。以免羣生溝壑之憂。卽造萬世無量之福。何幸如之。大局攸關。用敢冒昧直陳。

總統袁世凱復致第二電曰。

電悉。貴呼圖克圖。慈愛衆生。維持大局之苦衷。并辱獎譽。殊深感愧。近年邊吏

不職。虐待蒙民。以致羣怨沸騰。激成獨立。此等情況。內地胥同。貴呼圖克圖之
歉忱。固國人所當共諒。刻下國體確定。漢蒙一家。必須合力以圖新基。方能鞏
固。來電操縱一節。深知歸重中央。不必戀無謂之虛名。賈漢蒙以實禍。致人坐
收其利。天地聖佛。實鑒此心。今聯五族。組織民國。本大總統與貴呼圖克圖。在
一身。則如手足。在一室。則屬弟兄。利害休戚。皆所與共。但使竭誠相待。無不可
以商確。何必勞人干涉。自棄主權。前此各省。怨苦虐政。相率獨立。自共和宣布。
先後相繼取消。蓋皆不忍人民塗炭之心。而無爭城爭地之念。來電詞真。大愜
敵懷。務望大擴慈心。熟觀時局。刻日取消獨立。仍與內地聯爲一國。則危險可
免。邦本可固。民國對於貴呼圖克圖。同深感戴。必當優爲待遇。卽各王公各項
人員等。亦必一體優待。此後一切政治。更可博訪輿情。詳爲規定。定有以鑿蒙
族之希望。爲進大同之化。共和幸甚。其各無涯。否則鬩牆不已。禍將及全國。將
有同爲奴隸之悔。以貴呼圖克圖之明智。當不出此也。至蒙古與內地宗教種

族。習尚相同。合則兩利。分則兩傷。前電已痛言之。所有應行商確各節。電內未能盡達者。已派專員前往庫倫。趨謁住錫。面商一切。到時切望賜晤。至所企禱。旋接第八世哲布尊丹巴呼圖克圖第二復電曰。

貴大總統量涵大海。聯合五族。創造共和新基。大爲中外景仰。惟我蒙旗。遭此競爭時代。處此危險邊境。所有一切。究與他族迥不相同。其中委曲。不待細陳。諒在洞鑒。勞人干涉。有礙主權。略知梗概。祇以時勢所迫。不得不如此耳。否則鹿死誰手。尙難逆料。再四思惟。其派員來庫。徒事跋涉。莫若介紹鄰使。商確一切之爲愈也。

袁總統接電。雖甚愠怒。以時屆隆冬。雨雪載途。難於用兵。且大局甫定。無暇北顧。俄人聞之。復多方阻撓。乃定民國元年十一月三十日。先與俄人開北京會議。協商蒙事。內聲明文件五條。聲明附件四條。於二年十一月五日簽押。繼卽進行恰克圖會議。中俄蒙三方各派專使如左。

中華民國大總統袁世凱特派

都統銜畢桂芳

少卿銜上大夫駐墨西哥特命全權公使陳錄

俄羅斯帝國大皇帝特派

駐蒙古外交官兼總領事國務正參議官亞歷山大密勒爾

外蒙古第八世哲布尊丹巴呼圖克圖汗特派

司法副長額爾德尼卓囊貝子希爾寧達木定

財務長土謝圖親王察克都爾札布

綜計此次會議。自三年九月以迄四年六月七日。簽約於恰克圖。共二十二條。中國承認外蒙自治。外蒙承認中國之宗主權。外蒙古博克多哲布尊丹巴呼圖克圖汗名號。受大中華民國大總統冊封。凡遇有典禮及正式聚會。中國駐庫倫大員。應列最高地位。如遇必要時。該大員有獨見外蒙古博克多哲布尊丹巴呼圖克圖之權。

俄國代表亦享此獨見之權。

四年六月十六日。北京政府特任陳錄爲都護使。充庫倫辦事大臣。於十月二十六日。到庫就職。賞送袁總統禮品。第八世哲布尊丹巴呼圖克圖通電申謝。乃婉商册封第八世哲布尊丹巴呼圖克圖之儀式。久而未決。五年一月十日。第八世哲布尊丹巴呼圖克圖及達吉尼母。特派司法長車臣汗那旺那林。兵務副長額爾德尼郡王札木彥多爾濟等。進京奉呈大總統貢品。計禮單二分。第八世哲布尊丹巴呼圖克圖之禮單。計大黃哈達一方。貂皮四張。駱駝二匹。白馬四匹。達吉尼母之禮單。計大黃哈達一方。貂皮四張。駱駝二匹。黑馬四匹。帶同隨員四名。醫官二名。繙譯一名。僕役二十八名。於十三日由驛赴京。陳使並於先期電請派隊迎候護送來京。蒙藏院優與招待。以示綏柔。三月三日。庫倫外交官長車林氏。來述外蒙所以不能承認册封者。因北京派遣册封專使兩員及隨員翻譯。不下五六十人。外蒙艱於供應。且哲佛雙目棄視。繁重儀文。難於辦理。請簡易禮節。陳錄電告政府。四月一日。奉

大總統批令。着派陳錄爲冊封專使。七月八日。始行冊封。大總統策文曰。

超凡表聖。騰珠裝寶飾之輝。慕義酬庸。重玉檢金泥之錫。茂典逾於前代。同我太平。德音寄於行人。可使絕域。爾哲布尊丹巴呼圖克圖。慧契眞如。業持正覺。闡三乘之旨要。爲諸部所信從。植範遐方。承庥中土。迨民國之肇建。創五族以共和。前史未聞。始遲廻而有待。至誠所動。終翊贊而無疑。識大道之爲公。情殷向化。知民生之至貴。戒懷佳兵。維翰維屏。率舊章於壇坫。如帶如礪。申信誓於河山。既定誓書。爰行爵賞。茲以冊封爾爲外蒙古博克多哲布尊丹巴呼圖克圖。汗於戲。遠念蒼生。塵劫長銷於毳幕。善揚黃教。宗風益暢於龍沙。擴茲無外之規。進以大同之治。隆稱弗替。新命其承。欽哉。

外蒙自獨立後。日受俄人剝削。情感日離。歐洲大戰。俄國內亂。盧布重跌。損失更大。俄舊黨謝米諾夫。騷擾蒙邊。情勢危急。加以外蒙內部之財政竭蹶。黨派分歧。內政渙散。無法處理。第八世哲布尊丹巴呼圖克圖應外蒙王公之請。撤消自治。並派大

喇嘛與各王公入京。籌商善後。籌邊使徐樹錚。與外蒙總理巴特瑪會商。無條件撤消自治。議決於八年十一月十七日。由蒙署繕就呈文。分送都護邊防兩使署。樹錚於翌日隨帶呈文入京。北京政府於同月二十二日。據呈明令宣布。附錄撤消外蒙自治令曰。

據都護使駐紮庫倫辦事大員陳毅電呈。外蒙官府王公喇嘛等。合詞請願呈文。內稱外蒙自前清康熙以來。即隸屬於中國。噶噶向化。二百餘年。上自王公。下至庶民。均各安居無事。自道光年間。變更舊制。有拂蒙情。遂生歉怨。迨至前清末年。行政官吏穢污。衆心益行怨怒。當斯之時。外人乘隙煽惑。遂肇獨立之舉。嗣經協定條約。外蒙自治告成。中國空獲宗主權之名。而外蒙官府喪失權利。迄今自治數載。未見完全效果。追念既往之事。令人誠有可歎者也。近來俄國內亂無秩。亂黨侵境。俄人既無統一之政府。自無保護條約之能力。現已不能管轄其屬地。而布里雅特人等。任意勾通土匪。結黨糾夥。迭次派人到庫。催

逼歸從。擬行統一全蒙。獨立爲國。種種煽惑。形甚迫切。攘奪中國宗主權。破壞外蒙自治權。於本外蒙有害無利。本官府洞悉此情。該布匪等。以爲我不服從之故。行將出兵侵疆。有恐嚇強從之勢。且唐努烏梁海。向係外蒙所屬區域。始則俄之白黨。強行侵佔。拒擊中蒙官軍。繼而紅黨復進。以致無法辦理。外蒙人民生計。向來最稱薄弱。財欸支絀。無力整頓。槍乏兵弱。極爲困難。中央政府。雖經擔任種種困難。兼負保護之責。乃振興事業。尙未實行。現值內政外交。處於危險。已達極點。以故本官府。窺知時局現況。召集王公喇嘛等。屢開會議。討論前途利害安危問題。冀期進行。咸謂近來中蒙感情敦篤。日益親密。嫌怨悉泯。同心同德。計圖人民久安之途。均各情願。取銷自治。仍復前清舊制。凡關於黜陟札薩克之權。仍行直接中央。權限劃一。所有平治內政。防禦外患。均賴中央竭力扶救。當將議決情形。轉報博克多哲布尊丹巴呼圖克圖汗時。業經贊成。惟期中國關於外蒙內部權限。均照蒙地情形。持平議定。則於將來振興事務。

及一切規則。並於中央政府統一權。兩無抵觸。自與蒙情相合。人民萬世慶安。於外蒙有益。卽爲國家之福。五族共和。共享幸福。是我外蒙官民所共祈禱者也。再前訂中俄蒙三方條約。及俄蒙商務專條。並中俄聲明文件。原爲外蒙自治而訂也。今既自己情願取銷自治。前訂條件。當然概無效力。其俄人在蒙營商事宜。俟將來俄新政府成立後。應由中央政府負責。另行議訂。以篤邦交而挽利權等語。並據西北籌邊使徐樹錚呈同前情。核閱來呈。情詞懇摯。具見博克多哲布尊丹巴呼圖克圖汗及王公喇嘛等。深明五族一家之義。同心愛國。出自至誠。應卽俯如所請。以順蒙情。所有外蒙博克多哲布尊丹巴呼圖克圖汗應受之尊崇。與四盟沙畢等應享之利益。一如舊制。中央並當優爲待遇。俾共享共和之福。垂於無窮。本大總統有厚望焉。

外蒙既已撤治。中央特加優禮。於宣布撤消外蒙自治令之日。奉大總統册令。加封第八世哲布尊丹巴呼圖克圖爲外蒙翊善輔化博克多哲布尊丹巴呼圖克圖汗。

并加封額爾多尼爲外蒙古昭敏淨覺額爾德尼車臣敦都布刺木。十二月二日。特派徐樹錚爲冊封專使。擇定九年正月一日。行冊封典禮。

都護治蒙。政績卓著。偷不輕易更動。外蒙本可無變。乃民國八年。西北籌邊使。以武力壓迫取消自治。冊封活佛。退就法王名號。大傷蒙情。及樹錚去。第八世哲布尊丹巴呼圖克圖左右之大喇嘛。欲操政權。煽惑獨立。俄駐庫領事借洛夫乘機助之。九年八月間。密遣使赴赤塔謝米諾夫處。要求協助。十年二月。俄白黨佔據庫倫。首將恩勤。於三月二十一日。擁第八世哲布尊丹巴呼圖克圖重登寶座。宣布獨立。七月十七日。蒙古國民革命黨。導俄赤黨。復佔庫倫。成立國民革命政府。議決建國綱要。奉第八世哲布尊丹巴呼圖克圖爲立憲君主。政府在其下。十三年三月二十日。第八世哲布尊丹巴呼圖克圖示寂於庫倫。享年五十有五。

第二章 章嘉呼圖克圖

第一節 章嘉呼圖克圖先世源流（第一世至第十三世）

皈依三寶

夫芸芸衆生。殆皆寡見鮮慧。心累顛倒。徒滋煩惱。夢焉不悟。良可悲也。若人生不知修善。死則必遭業墜。人既有生。曷云不死。死能不昧。樂極於生。苟明其眞理。究其密諦。不但煩惱自消。且臻樂境。潔同蓮性。人咸景仰。惟我至尊宗喀巴佛。具清淨之本性。存慈悲之衷懷。皈依三寶。流厥經傳。勸導衆生。同臻彼岸。光並日月。長燄智鏡。偏照十方。永垂不休。

我佛釋尊降世以來。念羣生之多劫。閔善昇之無緣。朝作夕息。無非勢利之場。西擊東弛。盡是業慾之區。故大發慈悲。導修善行。冀此共撥迷途。同臻福境。不界僧俗。無別庸智。咸能虔誠皈依。自是修成佛願。務宜頂禮釋尊。恪守梵律。敬師尊長。分所當然。心記口誦。終始如一。

革珠毘枯純孟者。具心慈悲。廣製經卷。使諸衆生。日勤唵誦。洗除污惡之念。俾臻極樂之界。勸善懲邪。造福匪淺。雖人性有智愚之別。而收效之果則同。苟智者皈

依佛教。其慧識更增。根基益固。愚者皈依佛教。亦能成智慧之人。况人多輕於識字。而重視財帛。詎知人之能識字。猶身之有兩臂。能識字即能唵誦經卷。增進慧識。行善修德。造成清淨之身。卽是來世之福。若身無兩臂。舉止失效。人不識字。便是愚昧。故識字之於人。譬身之有兩臂。其關係之切。不待智者而後知也。故人能識字誦經。則身性俱淨。頻臻福境。若暗室發光。益現其顯。

佛降西極。特創經律。以繩人心。世界上人。首宜博施濟衆。造果將來。次則僧伽。既受佛戒。尤宜守律。毋妄違規。三宜涵養眞性。毋因人毆辱。便生嗔怒之態。四宜多得智慧。有先知先覺之能。五宜心情清淨。說得到。便做得到。六宜聽得便記得。記得便永永不忘。

人之生也。父母有撫育之恩。而父母不可以不孝。及其長也。從學於師長。而師長不可以不敬。修此規律。俾使黃教喇嘛諸衆。愈生敬仰。至尊宗喀巴有二信徒。虔誠皈依。傳至於今。毫釐不爽。三位上師者。盡悉世間一切。具足慈悲。超濟衆生。世世

相乘。至今無墜。宛若金山。不朽不壞。爲國爲教。咸被福綏。

文殊師利佛奉諭勅封灌頂菩薩廣慈大國師。宣揚黃教。傳播蒙古。大國師良爾新家呼圖克圖。與奉旨總理黃教祖師朗波森巴拉鄧達波才摩莫巴拉森波。均具衷誠。宏宣教法。故歷世帝王以迄於今。尊敬之儀。益見其隆。管理厥教。永無殫期。漢滿蒙藏。互相尊崇。夫佛法盛於西土。注於東域。近益東漸。光若日月。雖欲破壞。鮮克其的。佛法待人。視同平等。設教傳道。以渡迷津。先世依中印度釋迦牟尼佛之於諾托肩記及西藏等處佛教。迨後印度佛教漸衰。轉盛於西藏。後由甘肅傳入內蒙。包噶達。乃釐定教規。整理教門。人人務須唸經。咸得以修道。初托依思發跡於納托噶。又宏佛法於西藏。厥此二因。前世章嘉。均明斯義。教門規定。章嘉爲佛轉世。或常人轉世。乃不能說。蘇打孟奈瑪豺拉經曰。誕生善地。知其根本。留他聰明人。能知秘密事。雖不能說。似亦可說。又曰。第五世達賴喇嘛於世界一切。能知能說。阿彌陀佛轉世之班禪額爾德尼。嘗言尊者所轉世之像。具足莊嚴妙相。修道之人。後世能知。

前三世之事。此皆歷載經典。簡說如左。

第一世。其時世界莊嚴。衆生聚集。有森泰葛根者。乃善種菩提人也。具足莊嚴。出家爲僧。虔修佛法。諦聽尊者經。受持謹嚴。深承妙音。衷心信服。群疑俱釋。旋佈道於皇帝家主。咸願其引路。希望脫此世界。轉生於西方極樂世界。

第二世。耶河托里噶超巧奪依噶丐呼圖克圖奈遜奈。轉世於烏納托噶。群經畢通。衆皆知其爲黃教祖師。頂禮佛前。皈依甚衆。旋奉妙旨。任總持密宗之主。釐定法規。斯時佛教。因以大宏。

第三世。達巴保亞薩里亞。轉世於烏納托噶。當年少時。卓絕無倫。能將群經奧理。逐條分釋。顯揚妙法。於是密宗教典。大放光明。梵土之人。咸皆景仰。惟時西藏尙未發達。後偕邦噶巴超諾勒存師徒七衆。同低巴藍伴之耶。更事參拜班第達摩訶菩提。畢習梵典各經。故耶地佛教。至今不衰。住世一千二百年。特念經咒。爲世界衆生。使之咸臻極樂世界。其功績可謂偉矣。

第四世革那巴拉森者。係蘇達轉世。據蓮法經。稱爲釋迦牟尼徒弟。轉世於巴兒之革巴薩小村中。父名革巴朗頓。母名朗遜達里。結坡買。解釋經典。修持戒律。良績俱在。旋抵烏納托噶。宣揚佛法。衆皆目爲智慧之人。後至西藏。翻譯密宗經典。一百八人之中。惟革那巴拉森爲第一。其聰慧無有可比者。時分教門爲三世。稱爲第二祖師。

第五世密宗祖師騷坡苦巴。誕生於甲寅年。生八月。父病卒。其母及其舅父移於亞坡烏爾撫育。十五歲出家。拜苦坡爾囊爲師。留格達隆三年。專習佛典。十九歲。佛教經律。均能貫澈。名望遂隆。精於翻譯經卷。時人稱爲第一祖師。後修法於那賊。闡坡庫。越數年。著述經典。深受護法大師嘉許。當祖師年少時。卽具莊嚴妙相。精通奧妙經典。護持衆生。而衆生成皆敬之畏之。時人又稱爲窩跡怕尼。尊爲密教祖師。因復翻譯密宗經典。有深具智慧。造福衆生之門徒千餘人。宣揚佛教。創修寺院之門徒。爲數尤衆。有四大弟子。名且騰加那喀。蘇爾那加。荷爾駱。亞那卽蘇卽場爾。創

四大佛教。如牛通加伯通。他爾基。松通。加通。及四大教門。如松瓦基通。由通荷爾伯。龐通覺基求。愈巴却森。更有十二高徒。祖師將圓寂時。宣諭四大佛教門徒。集合於足坡苦亞會。卽祖師修法處也。其地幽雅清靜。每屆修法之際。先在聽路。預備一切。四大教門喇嘛從祖師前往會集。飲食既畢。祖師亦卽諭大衆。宣揚密宗教義。佈道既已。繼諭衆曰。今擬棄此而去西方。諸衆毋以我去。因生哀憐。而要強留。世界衆生。莫不有死。衣食住行。亦無所用。惟願死後。早到西方。斯爲極樂。說竟。而祖師之靈魂。上升天空。隨之誦經。時肉體已棄於地下。而誦經之聲。尙在雲際。歷歷可聞。僧衆覩狀。悲泣交集。咸乞求回世。頂禮哀懇而無已。祖師遂發慈悲之念。化爲一鳥。向下飛來。謂大衆曰。毋再悲哀。我已回來。復歸於塵世矣。遂將靈魂復於肉體之內。迄第二甲寅之年。乃圓寂而去。西方極樂世界。遺體荼毗。當此次圓寂之時。衆見一莊麗少年。乘馬而來。毛色淡黃。鞍似海螺所成。及抵寂所。下騎牽贈祖師。轉瞬而少年已不見矣。又有龍王人等。來贈珍璧禮品無數。衆所共睹。咸相驚奇。

第六世。司塞龍瓦。轉世於亞雷比肯那。少時。聰慧異常。精究經律。貫通佛法。宣揚教義。不遺餘力。創修四臂觀音像。終日虔誦六字大明咒。勸導衆生。使免罪於世界。密教盛行。衆乃稱爲觀世音菩薩。尊爲密教祖師。

第七世。朗足通瓦。轉世於佛因。生於甲午年。在勞格足出家。取名達爾乞森格。復至各處研究教典。向各方大德喇嘛。學習經律。三千大部經典。均已畢習。持創戒規三百二十二條。使出家僧衆。依據戒律。毋相違犯。時吉祥天母龍王等。覩斯戒律。咸來受戒。祖師誡大衆曰。無論何人。唸經一次。可免一切罪孽。而况逐日唸經乎。唸經之後。佛法既通。具良智慧。聞一知百。不談惡言。不行惡事。六道衆生。人非人等。苟作業惡。難脫人身。以故世界衆生。苟能發願向善。虔修佛法。一心念佛。無論脫於何道。受何罪孽。均能洗刷而抵極樂世界。素善誦經。尤宜專心。毋或稍怠。肉眼看經。雖不明晰。但宜繼續。切勿放棄。倘或耳膜不聰。頸生瘰癧。腿臂毀損。口不能言。至此疾苦。更宜專心經典。不可怠忽。至死方已。祖師自其師父伯多巴喇嘛圓寂後。卽往通

足多之北方。唵經。供物忽被一黑鳥啣去。落於倫通山上。祖師卽隨之而去。旋在其地。修法三年。當地長官。匝古加者。覩斯情況。敬而奉之。唵經之際。山泉湧。如同玉液。病者飲之。痊愈。盲者飲之。明目。水泉之內。復現三仙女。以奉祖師。居民復修創寺廟。集合僧衆。宣揚佛法。密教昌盛。六字大明咒。定爲傳經之最要者。終日唵誦。其地原係蠻荒絕域。風俗惡劣。自佛法輸入以後。頓成莊嚴世界。雖未開闢之野民。盡作佛教之信徒。祖師訓服羣衆。恩威並施。故人民莫不敬而畏之。俯視衆生。深具慈悲之念。如同菩薩降世。寺院僧衆。多至二千。享年七十。於癸卯年四月念三日。圓寂。圓寂後。其弟子成菩薩者無數。厥後倫通山中。若花若草。均增美觀。風起葉動。聲若誦經。居民日事操作之外。唯唵經而已。自斯以後。衆人均尊稱。朗足通瓦爲菩薩。

第八世。拔思巴喇嘛。轉世於西藏之格哈韓塞加邦。由地方。時元乙未年三月初六日。誕時衆已知爲自光明天處而來。父名森撒蘇他。那莫加拉松。爲薩迦班禪兄弟之師父。母名溫加達。十歲。至拉薩。從薩迦班禪受小戒。戒名隆足加客森。十七

歲更從薩迦班禪習各經律。聰慧絕倫。過目不忘。衆等莫不誠心悅服。癸丑年十九歲。元世祖忽必烈遣使請之來朝。宏揚佛法。尊爲國師。賞贈珍品無數。拔思巴喇嘛悉分賜各喇嘛。乙丑三十一歲。回後藏。丁卯三十三歲。復受世祖召東來。勅諭拔思巴喇嘛創造蒙古文字及各國法律。並譯西番經典爲蒙文。操筆立書。庚午三十六歲。授畢密宗經典。旋封大寶法王。頒賞一印。丙子四十二歲。回後藏。庚辰年十一月二十二日圓寂。享年四十有六。

第九世羅布桑。西藏諸呼圖克圖之中。有名桑弄邦者。卽祖師之父也。祖師聰明清穎。自異常人。誦經習字。均具良蹟。並能洞悉大千世界之事態。心情曠達。妙相莊嚴。十一歲。從剛格路扎喇嘛受小戒。十七歲。依僧衆受格蘇路戒。當受戒時。嚴守規矩。法名蘇達喇嘛加拉松伯拉森波。二十歲。因欲貫悉眞理。成立一會。曰却當。有巴木伯蘇達喇嘛札格巴者。卽其師也。具受活佛供敬之理。後又在各僧衆中。受烏蘇馬巴特戒。受戒後。卽爲却當會中重要人物。衆均恭敬。替世界已死衆生人非人。

等。超度修法。每日不倦。不飲酒。不食肉。不穿袖領之衣。嚴守戒律。依據大戒二百五十三條之戒規。無一觸犯。會中事均依真理而行。故以講演真理之名名斯會。有喇嘛名達札里巴格莫修巴者。皈依之。後駐錫輝伯爾薩米亞寺時。有富戶皈依之。並發願修理寺院。其地野人。咸被教化。前來皈依。相待以情。道之以義。繩之以律。以故尊之爲烏簪開摩伯。施薩之人。亦同稱之。

第十世至尊宗喀巴乘妙理經車東駛。宏揚佛法。抵大海濱之時。適甲卿曲吉降生。時在佛曆第六甲子二十八年之甲午。皈依至尊宗喀巴而出家。從習密宗經典及戒律。常聚一處。爲至尊宗喀巴之最親信者。後於至尊宗喀巴處。求得秘藏密宗經典九冊。關於章嘉呼圖克圖之事蹟。中亦詳述。並歷叙佛教永不毀滅。如同天日。愈久愈盛。苟天不滅。而佛教亦隨之永存。至尊宗喀巴旋謂祖師曰。色拉寺爾蓋修之。祖師遂於佛曆第七甲子三十三年己亥興工。至今其寺巍然尙存。年至六十有一。時明成祖遣使入藏。迎請至尊宗喀巴。至尊宗喀巴諭使者曰。苟甲卿曲吉願

去。實同親來。永樂十二年。至尊宗喀巴遂遣甲卿曲吉至北京。是年十二月二十五日。駐錫番經廠。十三年乙未二月初九日。發大宏願。開設法會。誦天下太平之經。期爲一月。四月初五日。奉旨晉封大國師。贈金印。繼開法會。五月具奏。朝見五臺。及抵五臺。修法誦經。爲時一載有餘。十四年五月。由五臺回前藏。二十一年。旨召來京。宣德四年己酉入京。晉謁宣宗。年七十有六歲。仍駐番經廠。優禮之隆。益盛於前。宣德十年乙卯十月二十四日圓寂。享壽八十有二。

第十一世。求基迦勒薩巴拉森伯。己未年轉世於甯通加克巴欽善達官之家。父蘇他南保。母足里馬伯木。生卽智慧。行同前賢。從師那晉瓦求基干格達林基喇嘛。勤習經典。十三歲。受小戒。創立醫學院。以培植濟世之醫師人才。旋從求加爾巴朗撒巴爲師。經典畢習。二十四歲。依格拉當釋迦牟尼至尊宗喀巴靈前頂禮。抵塞辰時。有里爾當尼巴爾加龐秦者。與其子均皈依。隨從聽受至尊宗喀巴之經。生陀羅尼經。旣畢。旋去之足隔里伯格爾通南伯粒加拉瓦寺。有西路森伯。修格修里秦

撒伯皈依之。僧衆既多。卽授小戒。戒畢。尊之母犯。乃造經以歌詠之。二十七歲。親入南心學院。習翻經教經之法。計時三載。復著經以紀之。三十一歲。駐錫迦秦寺。作嘑誦經。宏揚至尊宗喀巴教中之佛法。多尼烏達巴拉當喇嘛迎至倉上。於塞字加瓦寺中任大喇嘛之職。四十三歲辛未。召集王公貝勒貝子及僧俗共數千人。宏佈傳經傳法。創造戒律及誦經規儀。計數卷傳於世。戊戌七十歲。爲根敦珠巴卽第一世達賴喇嘛製僧俗戒律規程。著菩提道經密宗經求兩經等各經典。圓滿之年。時駐錫蒙古。年七十有六。是年甲辰十一月十九日。天正嚴寒。趺坐西天如來佛前。誦經入寂。

第十二世。錢突巴粒迦托爾珠。於辛酉年。轉世於澈里微窮納之遜姆美加哈粒小村中。父松那爾巴。係紅教喇嘛。具大智慧。精通經法。母加朗姆森。生卽聰穎。兄弟三人。均係呼圖克圖所轉世。深明佛法。從師索特乃木加摩索。及迦拉森摩迦索。聽受經典。學習灌頂。既畢。十七歲。從索特乃木迦索層巴蔡爲師出家。旋從索特乃

木迦拉森爲師。二十歲時正佛法宏揚。勢已東漸。拜師受烏拉哈噶森迦沙之小戒。復習各經典。畢。衆均尊稱爲欽特班第達喇嘛。智慧能力。酷肖甲卿曲吉及求基迦勒薩之二代。在索拉托克卿里札錢拉森寺中。修習密法。又在遜蘇拉加瓦寺。從求基薩托乃木判珠。及求基則特迦沙爲師。益習各經典。獲得路塞粒迦巴卿之法號。四十四年甲午。到至尊宗喀巴之札拉達納勃粒托噶達家中。欽基巴粒窮札沙哈巴深具佛法。從之爲師。學習宏法能力。受巴力窮路呂卿巴大戒。爲西藏大寺之首座喇嘛。創造經典甚富。癸酉年三月。抵佈達拉。晉謁第五世達賴喇嘛。修理佛像。丙丑年八月十一日夜入寂。年七十有七。第五世達賴喇嘛爲造一塔供奉之。

第十三世黃教經皇章嘉呼圖克圖禪克巴朗塞粒。轉世於達姆突遜卡巴之格爾路札巴里寺之旁。因以章嘉村名之。幼能勤習經典。深晤世界活佛將來均能成佛之念。因之出家修道。所有密宗經典。均依前世之傳法。搜集殆遍。依梵經規律。創造諸經。傳授僧俗。修理大寺。至今尙存。更創大寺一座。設立傳授密宗之修習方

法。後至轉世地方。駐錫格倫寺中。爲衆喇嘛之師。授以新由藏傳來之密宗經典。各方來爲喇嘛者。爲數甚夥。乃上山淨修道法。著作經典。習法已畢之徒。均尊稱章嘉呼圖克圖爲羅伯卿。如夏日之雨。僧俗人等。均以斯名尊稱之。後卽圓寂。

第二節 第十四世章嘉呼圖克圖

第十四世。具足智慧。黃教祖師阿噶旺羅布桑却拉丹巴拉森波。於甲午年十月初十日。轉世於至尊宗喀巴降生處依格之達卿格小村中。父張益華。母秦木沙。性情忠厚。常行善事。終日頂禮三寶。其母孕時。夢日入懷。未生以前。常作佳夢。生卽能言。自云吾係禪克巴朗塞粒所轉世。前世弟子證以各寺所供之佛像經典。均能辨識無誤。父母駭以爲鬼也。勸勿言。輒啞不作聲。父母深患之。醫不得療。入寺供奉。依然如故。乃命受噶特扎伯小戒。戒甫畢。卽能言。前世皈依弟子復問寺中所供奉之佛像經典。應設何處。均能一一答覆。未習經典。卽知其名。並解其義。僧俗各衆。無不奇服。事稟班禪額爾德尼。班禪答曰。此真第十三世轉世之第十四世章嘉呼圖

克圖也。五歲。諸弟子迎之。駐錫於格倫大寺。九歲。迎駐格倫札巴里寺。十一歲壬辰。清世祖遣使迎第五世達賴喇嘛東來。使者在途遇第十四世章嘉呼圖克圓。爲之受小戒。後駐格倫寺。拜達爾巴拉薩札拉森爲師。習大經三部。天資聰敏。衆皆稱爲第一。學畢阿彌陀經時。再修法而習上樂經。妙果修成。衆敬供之。辛丑年。來藏晉謁達賴喇嘛及班禪額爾德尼。具足頂禮之數。其俗頂禮。以叩頭十萬爲敬。至頂禮於各大寺。心中惟念爲世界衆生共謀幸福。從第五世達賴喇嘛受阿跋拉噶森欽達小戒。拜判爾路甫欽巴爲師。又習三年。修波羅密經。二十三歲。從第五世達賴喇嘛受大戒。乙巳年二十四歲。又拜亞跋路才札摩沙爲師。學經五部。並習印藏各典。丙寅年。抵布賚紉寺。榮膺里塞粒札巴周名。庚戌年二十九歲。赴拉薩講經。衆首推之。諸師教授各經。均已畢修。自二十一歲至四十二歲之間。衆知其貫通經典。淨修佛法。俱臻上乘。梵土喇嘛亦多來從學。康熙元年戊寅。二十一歲時。赴藏晉謁第五世達賴喇嘛。尊爲師父。專修經典。至康熙二十二年始回。時適外蒙札薩克圖汗與土

謝圖汗二族之爭。第五世達賴喇嘛遣使調解二族。未幾。與噶勒丹寺之錫喀圖呼圖克圖二人同抵青海。前往宣諭。兩族因之和好如初。時康熙二十六年。年四十有六。復同至北京。具奏清廷。聖祖深器之。賞賜珍品。二十七年。告假回。三十二年。旨召來京。駐錫法源寺。又賞賜御物。受札薩克達喇嘛職。隨從噶布楚蘭占巴喇嘛十五人。各賜口糧。三十三年。復奉旨避暑口外。賞賜蒙古房屋駝馬。及各應用物件。爲數甚多。秋回。任職京師。所有御畫佛像。均命誦開光經。駐節京師二年。每夏則避暑南苑。三十六年。第六世達賴喇嘛轉世。初乘寶車入藏。由蒙古道經甘肅寧夏。旋奉帝旨。命至青海。勸導各台吉晉京入覲。當馳抵青海。召集各台吉。諭以崇奉天朝。蒞京朝覲之意。各台吉均能服從。各朝京師。咸悅內附。事畢。乃西入藏。及回京。奉召入覲。經抵多倫諾爾。以及長城各要塞。創修寺院於多倫諾爾。傳教內外蒙古。寺成。各旗喇嘛謂寺爲宣揚黃教之大伽藍。羣赴寺中謝恩。修理寺院之規及畫像土木等。均躬親督率。蒙旗喇嘛皆依律來寺興法焉。四十年。諭旨多倫喇嘛廟總管喇嘛事務。

之札薩克喇嘛。規定每年夏避暑多倫。並任宣揚傳教誦經之責。冬返京任職。四十四年。聖祖駕抵多倫。巡幸各寺。並檢察各旗來駐各寺之喇嘛。時貢良馬九匹。駱駝九匹。暨各樣物件。均以九數。計九色。八十一件。聖祖深嘉之。特頒諭旨。略云。內外蒙喇嘛悉來多倫寺中。修習經典。宏揚佛教。朕心欣慰。特以多倫之寺賞之。又諭曰。請爾呼圖克圖久住多倫諾爾之廟。宏揚佛法。來日晉京。賞爾呼圖克圖名號及大國師印。四十五年。賞給金印。計重八十八兩八錢八分。誥命九龍黃襪。貂皮襪。四十九年。告假回西甯。起節之際。飭賜紫車。五十年。第四皇子撥欸收買法源寺。時亦撥欸修理寺內各殿。購置周圍基地。三大士像供奉於大殿。五十一年。工竣。上表請賜寺額。旨賜嵩祝寺。五十二年。聖祖巡幸多倫。第十四世章嘉呼圖克圖隨往。恩禮有加。聖祖入殿行香既畢。面諭第十四世章嘉呼圖克圖曰。斯廟既極莊嚴。各旗喇嘛均來宏法。朕心甚慰。追溯來源。均爾一人之力。黃教之事。由藏東向。均歸爾一人掌管。賞賜珍寶多件。五十三年。聖祖旨請第十四世章嘉呼圖克圖誦經於避暑之殿。五

十四年。第十四世章嘉呼圖克圖病。從多倫遣使奏聞。聖祖深憂之。卽遣四品頂戴賴碩及瑪里巴崑沙赴多倫慰之。卽於是年五月二十六日巳時入寂。聖祖聞之甚恫。賞賜重五十兩之銀爐一。大哈達一方。檀香四束。哈達二百。銀一千兩。諭藏司托巴喇嘛耶冷巴達爾奇等。將第十四世章嘉呼圖克圖龕座。於本年九月二十二日。由多倫諾爾運供於西甯之寺院。

第三節 第十五世章嘉呼圖克圖

第十五世。羅賴畢多爾吉耶喜忒皮嚼鉢曼伯拉森波。初。蒙古憲宗延請經皇薩迦班禪至甘肅涼州。宏揚佛法。第十五世章嘉呼圖克圖卽轉世於此。父欽迦鎔格路坦森。母波奇忒。於第十二甲子之丁酉年正月初十日昧爽出世。初。其母孕時。夢覺身爲一金球。又夢胎中藏一金人。生後二歲。甫開口卽說。我卽靈藏耶也喇嘛也。繼言。拒南有大寺一座。我宜於此寺充任喇嘛。言時。甘甯西藏等處僧俗各衆。無不知之。斯時班禪額爾德尼暨各處喇嘛。均往視察。確証其爲第十五世章嘉呼圖

克圖之呼畢勒罕。旋經僧俗各衆。叩問班禪額爾德尼及各大呼圖克圖。此幼孩是
否爲前世章嘉呼圖克圖所轉世。均答以確爲前世章嘉呼圖克圖所轉世。乃將轉
世之事。具奏清廷。聖祖聞之甚慰。奉旨。尊爲第十五世章嘉呼圖克圖之呼畢勒罕。
使習經典。四歲。延之格隆札伯里寺。七歲。常誦之經。均已畢習。受亞鏊耶喜欽奇藏
嚙巴小戒。初。聖祖從前世章嘉呼圖克圖爲師。修習經典。至雍正二年。世宗因本世
章嘉呼圖克圖既已降生。虔修經典。旨召來京。時甘肅將軍於降旨之日。諭轉第
十五世章嘉呼圖克圖護送來京。沿途費用均由庫給。歷五十天。始抵京城。年八歲。
駐錫旃檀寺。辰年。世宗擇日駕幸旃檀寺。第十五世章嘉呼圖克圖來謁。世宗喜。抱
之。十一月十六日。由旃檀寺迎至嵩祝寺。地鋪黃氈。賞乘黃車。九龍襪。及各種珍品。
遣官護送。僧衆載道。優禮之隆。愈於前世。抵嵩祝寺。高坐法座。誦經諭衆。僧俗無不
悅服。由庫撥用器具。並賜金銀財寶綢緞等物。年給國俸。雍正九年。復修善因寺。工
竣。卽賜第十五世章嘉呼圖克圖。御製碑文賜之。其詞曰。

洪惟我皇考聖祖仁皇帝。恩被九有。威加八紘。曩歲厄魯特噶爾丹跳梁朔漠。擾亂喀爾喀諸部。喀爾喀七旗數十萬衆。懷德慕義。稽首內附。皇考射率六軍。遠行天討。駐蹕多倫諾爾之地。受喀爾喀諸部君長朝謁。錫之封爵。爲我屏垣。旣翦兇渠。藩定朔漠。撫安藩服。允從諸部所請。爰於斯地。創建彙宗寺。俾大喇嘛章嘉呼圖克圖居之。章嘉呼圖克圖道行高超。証最上果。博通經品。克臻其奧。有大名於西藏諸部。蒙古咸所尊仰。今其後身。秉質靈異。符驗顯然。且其教法流行。徒衆日廣。朕特行遣官。發幣金十萬兩。於彙宗寺之西南里許。復建卍字。賜額曰善因。俾章嘉呼圖克圖呼畢勒罕主持茲寺。集會喇嘛。講習經典。廣行妙法。蒙古汗王貝勒貝子公台吉等。俱同爲檀越主人。前身後身。敬信無二。自必率其部衆。聽從誨導。胥登善域。稽古聖王之治天下。因其教不易其俗。使人易知易從。此朕續承先志。護持黃教之意也。况此地爲我皇考駐蹕之所。靈蹟斯存。惟茲兩寺。當與漠野山川。並隨無極。諸部蒙古台吉屬下。永遠崇奉。

歡喜信受。薰蒸道化。以享我國家億萬年太平之福。朕深有望焉。

時第十五世章嘉呼圖克圖留居京師。並不時賞賜金銀珍寶衣物食品。遣使諭曰。呼圖克圖今宜勤習各種密宗經典。以備來日宏揚佛法。復與第四皇子同習漢蒙滿三種文字。十二歲。第二皇子與第十五世章嘉呼圖克圖。愛若兄弟。乃與帝說。第十五世章嘉呼圖克圖往來乘車。頗覺不便。帝乃賜以御乘。自十二歲至十八歲。漢蒙滿三種文字。均已精通。政教典籍。亦深貫澈。復將至尊宗喀巴及達賴喇嘛班禪額爾德尼之各種經典。僧衆戒律。深究窮討。宏揚黃教。修畢五大部經之後。僧俗人等。莫不尊爲最智慧者。釐訂寫經規矩。密宗戒律。旋世宗降旨諭曰。第十五世章嘉呼圖克圖與第四皇子。同習經典。深通漢蒙滿各種文字。朕心甚慰。第十五世章嘉呼圖克圖每次晉謁。世宗必問曰。現習何種經典。聞有一經。修法後可免飲食。十八歲。封灌頂普善廣慈大國師。賞賜銀印。重一百兩。及封冊。旨諭第十五世章嘉呼圖克圖。命赴西藏晉謁第七世達賴喇嘛。受大戒。並請第七世達賴喇嘛來藏。與第十

七和碩親王同去。於十一月二十三日出發。賚送紋銀二萬兩。珍品器皿無數。至翌年正月初一日抵藏。晉謁第七世達賴喇嘛。親交禮品。第十五世章嘉呼圖克圖在藏。常從第七世達賴喇嘛習經。始能貫通梵典妙旨。三月二十一日。第七世達賴喇嘛由家起節。四月抵拉薩。第七世達賴喇嘛在途中。每日均傳經典於第十五世章嘉呼圖克圖。稍有餘暇。則詳釋經中之理。及抵拉薩。第十五世章嘉呼圖克圖駐節噶勒丹寺。衆喇嘛羣請之至法座誦經。斯時第十五世章嘉呼圖克圖淨手之水。衆喇嘛羣相爭飲。並脫帽擲地。深恐道途崎嶇。不便行走。致損及足。其信服之誠。以至於斯。赴後藏札什倫布寺。晉謁班禪額爾德尼。十月十五日。班禪額爾德尼授第十五世章嘉呼圖克圖大戒。傳習經典。雍正十三年。世宗駕崩。班禪額爾德尼與達賴喇嘛聞訃。心憂之。及聞高宗登極。集衆喇嘛誦經恭祝之。第十五世章嘉呼圖克圖聞訃。卽離藏。由拉薩起節來京。高宗勅賜召見。乾隆元年十二月二十一日。特降恩旨。賞賜第十五世章嘉呼圖克圖管理京師寺廟喇嘛札薩克達喇嘛印一顆。八年

十二月二十九日。勅賜御用金龍黃傘。十六年。賜振興黃教大慈大國師之印。嵌眞珠帽一頂。式同康熙時所賞賜者。又札美休帽二。又僧伽帽一。又寶石帽一。帽有唵嘛呢叭嚩吽六字。又套帽一。帽有喇嘛二字。復諭曰。爾可依照前世。主持黃教。四十年十二月二十四日。爲六十壽。高宗賜佛像如意綢緞。五十年十二月二十四日。爲七十壽。高宗又賞佛像如意金銀各件。五十一年四月初二日入寂。是日謂高宗曰。我自入寂之後。又有轉世。請勿憂慮。寂後高宗甚悼之。賞銀一千五百兩。爲之熬茶。啐經。以金製塔賞之。又造石塔於五臺山鎮海寺中。卽其供龕座處也。至今巍然尙存。

第四節 第十六世章嘉呼圖克圖

第十六世。宗江之北。有地達奇噶比周森。地有寺噶達托布達。寺前有地札拉通。地多奇花異草。松柏參天。山泉澄碧。乃勝境也。而伊希丹畢札拉參巴拉森邦。卽降生於其地達者之門。父達札拉哲巴。母薩札達。時在第十三甲子之丁未年五月。

十八日。當未生時天晴。初生天雨。用雨洗濯。山鳥悠揚。若詠若唱。其樂也融融。前世章嘉呼圖克圖將入寂時。備言下輩轉世情況。高宗亦預聞。旨敕碩林安巴。轉賜禮物於所駐錫之寺。旋於每年五月十八日。地現奇瑞。天降長虹。衆咸爲異。孰知此卽第十六世章嘉呼圖克圖之轉世時也。第十六世章嘉呼圖克圖父母。卽報碩林安巴。轉奏高宗。旨諭前世所用器物。均令辨識。卽命章嘉呼圖克圖之札薩克喇嘛任辦此事。往見碩林安巴。奉旨同寺中碩伯森。將前世章嘉呼圖克圖所用物件。眞僞混合。命其辨識。均能分別。及見札薩克喇嘛噶里噶乃木哈時。喜甚。儼若素相識者。徵象旣具。碩林安巴卽奏聞。高宗深嘉之。如獲異寶。賞賜珍珠佛像金圈朝珠及御賜勅書各件。時第十六世章嘉呼圖克圖已知叩首禮拜。接受賜物。四歲。於八月初一日。從周塞亞瓦坦克達喇嘛。受路坡森札巴拉通沙迦索小戒。與却坡森喇嘛徒衆。共習經卷。分別講經誦經寫經之法。均一一畢業。七歲。從札森額爾德尼。受格蘇路戒。畢習密宗戒律。旋拜耶喜札拉森喜里伯汰拉爲師。習密樂威三經。坐壇城上。

念曼達拉等大小各經。及至尊喀爾巴所講之經。八歲。旨召至京朝覲。由歸化城察哈爾到多倫諾爾。以至熱河。帝聞。先遣臣以黃圍車迎之。及抵熱河。適高宗駕在。晉謁。當貢大哈達及金長壽佛。高宗諭曰。前世章嘉呼圖克圖圓寂。朕甚憂之。如慈母之失愛子。今爾既轉世來朝。如失復得。朕心甚喜。九歲。年事漸長。記憶驟增。旋由熱河回。移居他寺。學經多年。十一歲。聞高宗駕晏。急來朝。謁見新皇。由薩布森寺起節來京。吊唁之下。哀慟殊甚。晉謁新皇仁宗。親愛愈恆。十四歲。仁宗諭旨。令往西藏。仁宗預爲設備一切。第十六世章嘉呼圖克圖存心仁慈。亟亟於求漢滿蒙三族同享太平之福。並希望世界衆生同享太平之福。故常唵誦經咒。以濟世孽。抵藏。謁見兩尊照佛之像。並謁達賴喇嘛。各寺中均布施熬茶。至講經院習經。習畢大經五部。又從拉布森耶喜達巴拉布札喇嘛聽簡密法三經。有喇嘛喜里巴達拉者。再從之學。所有各種供器之規律。時輪金剛法會之道場。一一畢學。丙寅年。二十歲。受大戒。戒師拉布森耶喜達巴拉布札喇森巴。從第六十七世格拉達喜里克達。名克特

索里奇木。札塞喀巴托達克迦沙。才克荷比里克額爾德尼觀克。及吸爾喜克巴等四人受戒。十四歲至二十歲。均留學西藏。教政各事。俱能穎悟。又往西藏從喇湖呼圖克圖。學經修法。旋同來京。於十一月二十九日晉謁。賞賜貂皮襪。嘉慶十二年丁卯四月初五日。賞綠轎及珍珠之手珠。十四年。仁宗駕幸行宮。時亦晉謁。貢銀曼達藏香及馬一匹。是時第十六世章嘉呼圖克圖之隨從徒弟二十人。在宮念經三天。二十一年。賞貂皮襪。二十二年。賞銀頂綠轎。二十四年。旨封第十六世章嘉呼圖克圖爲管理京都喇嘛班第札薩克達喇嘛掌印喇嘛。辦理一切黃教事。是年九月二十日。駕幸嵩祝寺。第十六世章嘉呼圖克圖敬具茶果。仁宗賜佛像及眞珠之手珠。又賞貂皮大袍掛表等物。二十五年。駕幸行宮。晉謁。貢曼達哈達藏香。又同隨從之徒弟二十人。在宮念經三天。道光五年。賞喇嘛二字之狐皮帽。五百羅漢之手珠。八年。賞大國師印。印係銀質鍍金。誥命。金頂綠轎。九年。賞九龍襪。十四年。賞金製大國師印及金花。二十年。賞金頂黃轎。二十六年正月十八日。第十六世章嘉呼圖克圖

在嵩祝寺爲六十誕辰。宣宗遣臣往賀。並賜親書福壽二字。白玉如意。珊瑚手珠。第十六世章嘉呼圖克圖具奏。請以九九八十一羊爲貢。旨准。召入。備極優禮。宣宗面諭將彙宗善因二寺。及康熙五十三年至雍正九年。前後所修各廟。均歸管理。三月初六日。旨將免職諾們罕在察哈爾之牛羊寺產。又并歸第十六世章嘉呼圖克圖管理。是年六月初五日。第十六世章嘉呼圖克圖入寂前。親筆書呈理藩院一摺。轉奏宣宗。帝甚悲悼。旨遣大臣親王等。前往西甯設奠。並賜珊瑚手珠藏香緞疋。賞銀一千五百兩。熬茶誦經。旨命龕座供於五臺山之鎮海寺。

第五節 第十七世章嘉呼圖克圖

第十七世章嘉呼圖克圖。法名冶熙但璧呢瑪。轉生於第十六世章嘉呼圖克圖之處。卽札拉通也。父名童朗波。母名滿超。降生於己酉年十一月十二日太陽甫昇之時。扶護衆生。發大菩提道心。振興黃教。初道光三十年正月初二日。宣宗旨諭曰。章嘉呼圖克圖自道光二十六年入寂後。至今已屆三載。何以尙未轉世。切勿再行延誤。着速尋覓來告。以慰朕望。并派第十六世章嘉呼圖克圖之大弟子森沙巴及札薩克喇嘛札沙等。速行尋覓。是年三月。札沙等至西寧。來稟西甯欽差大臣喀拉沁曰。奉諭旨與第十六世章嘉呼圖克圖之弟超伯森呼圖克圖同去尋覓。並携前世章嘉呼圖克圖日常所需之鈴杵念珠暨他法器。令其認識。旋乃尋獲幼孩三名。靈異均著。西寧欽差大臣依例上奏清廷。文宗諭旨。於十二月十五日。在雍和宮法輪殿誦經禮佛三天。同禮藩院大臣滿入金本巴瓶中抽籤。抽得道光二十九年己酉。瑞耶巴噶地方唐古忒族童朗波之子。庶名森哈薩托者。爲真正第十七世章

嘉呼圖克圖之呼畢勒罕。十二月十七日。理藩院上奏。文宗旨諭准如所請。於十二月二十九日。着將森哈薩托。定爲第十七世章嘉呼圖克圖之真正呼畢勒罕。復將轉世事由。行文曉諭內外蒙各旗。勅賜呼畢勒罕人骨念珠。咸豐三年四月。諭旨嘉獎。六月十一日。上書謝恩。貢佛像哈噠。交西寧大臣轉呈。並旨賞佛像經卷哈噠珊瑚念珠鐘表暨其他物件。由西寧大臣轉給。五歲。從虛布森及蘭布森拖堂淡哲兩喇嘛受小戒。八歲。諭旨入京。於咸豐八年八月十九日起節。迄十二月十三日抵京。十九日。晉謁文宗於頤心殿。暢談一小時。當賜玉如意黃襪紅珊瑚項珊瑚念珠。復以金碗滿盛牛乳。賞給呼畢勒罕。謹飲牛乳而受金碗。繼賞法牀黃車。駐節京城。並准乘馬乘轎。文宗復諭曰。上輩所誦之經卷。茲宜虔心勤習。扶護黃教。使發寶光。異日博通妙典。朕決供養於爾也。旋貢物件謝恩。是年五月。告假赴多倫避暑。七月至多倫。內蒙四十九旗外蒙五十七旗。各旗王貝勒貝子公札薩克。均親蒞多倫。供奉珍品財物。行盛大之歡迎勝會。計共三日。備極優隆。冬回甘肅。翌年正月十一日。

抵高靈廟。聞文宗駕崩。心甚憂悼。旋於同治元年正月起節。至三月十三日蒞京。駐錫嵩祝寺。晉謁穆宗於內廷。貢哈唾藏香。回嵩祝寺。翌日復貢珍品寶物。穆宗諭旨嘉獎。并賜御物多件。旋率弟子二十人。誦經三日。既畢。告假入藏習經。先抵五臺避暑。七月由五臺至多倫。冬由多倫回安度。十一月初二日。駐錫超伯森廟。十五歲。從耶克却蒙哈噶地方之薩波叙堪布。名蘭伯森達薩尼孟及蘭伯森托達二人爲師。修習經典。復從精醫喇嘛超着及驅奇。哲揚耶喜。賀拉卿。革珠等著名喇嘛約二十餘人。諦聽妙典。十八歲。修畢五大部經。具足智慧。丙寅年二月十五日起節。在途唵誦平安經。四月二十五日抵藏。丁卯年二月初九日至奈克珠。其地緇素。設館招待。盛備禮品而奉供之。二月二十五日。晉抵拉薩。親蒞大小昭。頂禮聖像。並備供物無數。復蒞三大寺。遵照前輩之供養賬目。供諸三大寺之僧衆。登布賚紉講經座位。演說妙諦。精通梵文。緇素景仰。藏人莫不讚爲希有。旋從闢魯匹超爲師。修習經典。並修法規約誦經法則。又從羅桑喜朗渡王超噶爲師。修文殊經典。四月初一日。又從

薩曼達哲卿爲師。習密宗經典。綠度母經暨壇城法。戊辰年二十歲。六月初四日。初轉法輪。從哲拉色勒呼圖克圖受大戒。各方緇素均來頂禮而供奉之。蒙古王公暨甘肅等處僧俗。均來敦請。懇乞駕臨。宣揚妙諦。闡振宗風。二十一年藏。同治八年二月初五日。由駐藏大臣上奏清廷。奉旨於八月初五日由藏回蒙。同治九年四月十三日。駕臨京師。駐節嵩祝寺。當由理藩院上奏穆宗。十五日勅賜召見。貢大哈噶一方。長壽佛一尊。衣九。襪九。藏香三九。青馬九匹。黃馬九匹。各色馬共九匹。隴松九株。由理藩院轉收上奏。諭旨任職京師。敕封大國師。賞給金印。并賜誥命蟒服等件。穆宗面諭曰。呼圖克圖頃宜遵照前輩規律。扶助黃教。普度衆生。尤宜發大菩提道心。遠播宗風。厥後規定。每年五月請假回多倫避暑。十月來京任職。同治九年十二月。貢帝后乳品各九箱。二后賞黃緞三捲。十二月十四日。頒旨賜給貂皮坐褥。十六日起節回西安。是年十月十五日。第十七世章嘉呼圖克圖之母入逝。理藩院上奏。賜銀一千兩爲治喪費。時西寧回教謀逆。乃上殿唸經以靖國難。穆宗深嘉之。旨封第十

七世章嘉呼圖克圖之父公爵。花翎頂戴。同治十年四月初六日。諭旨着將多倫之善因彙宗二寺屬之管轄。賜給印信。上表謝恩。同治十三年十二月。穆宗駕崩。乃率徒十人。爲帝唵經超薦。光緒元年。告假赴五臺避暑。屆冬蒞京。時天寒風揚。心有所感。將抵京師。暫駐城外之天甯寺。卽行入寂。時在十一月初九日也。十六日。德宗諭旨曰。頃據奏報章嘉呼圖克圖入寂。朕聞不勝惋惜。初章嘉呼圖克圖告假回五臺時。聞腿有疾。來京時。飲食起居。尙稱完好。孰意遽行圓寂。且呼圖克圖日常維持黃教。闡揚宗風。甚屬努力。此朕之所深爲惋惜也。賞賜佛像一尊。珊瑚念珠一掛。銀曼達一座。大哈噠一方。小哈噠百方。大小香各一百份。黃緞五疋。蟒緞五疋。欽命貝勒納沙護送。供於第十七世章嘉呼圖克圖之靈前。色身入於法身。供於五臺山之鎮海寺。欽命親王包耶納呼護送之。旨諭駐藏大臣。命由藏庫撥銀一千兩給前藏。五百兩給後藏。德宗助給五百兩。以充第十七世章嘉呼圖克圖熬茶唵經之費。

第六節 第十八世章嘉呼圖克圖

第十八世章嘉呼圖克圖。法名羅藏丹森講索。戊寅年誕生於西甯之多隆基地方。父名阿朗薩松。唐古忒人也。母名開朗孟。初光緒七年。旨諭西甯大臣暨第十七世章嘉呼圖克圖之弟子等。勅令速尋第十八世章嘉呼圖克圖之呼畢勒罕。西甯大臣與第十七世章嘉呼圖克圖之弟子等。奉旨訪尋。旋抵阿朗薩松家中。見一幼孩。具足智慧。衆商議曰。此孩靈異。殆爲第十八世章嘉呼圖克圖之呼畢勒罕乎。卽取前輩所需法器等件試之。均一一認識無誤。西寧大臣上奏清廷。乃於光緒八年七月十四日。在北京雍和宮金本巴瓶依例抽籤。七月二十日。理藩院上奏。德宗准如所請。頒旨曉諭蒙古各旂王公。西藏達賴喇嘛班禪額爾德尼。并駐京各呼圖克圖。德宗敕賜御用之人骨念珠一掛。黃色大哈唾一方。癸未年六歲。八月初二日。依大金剛教海喇嘛爲師。修習威德金剛等經。從受小戒。甲申年七歲。四月十五日。從噶隆匝伯特耶丹薩喇嘛。受噶索戒。自六歲至九歲時。隨誦經典。均已畢習。並能寫經。唸典。超度幽魂。光緒十二年。九歲。十二月十二日。旨諭蒞京。十六日。晉謁德宗。

於中正殿。恭候聖安。十七日。召見於頤心殿。德宗親賜黃色大哈噠一方。西太后賞給珊瑚念珠一掛。旋下諭旨略曰。章嘉呼圖克圖呼畢勒罕。自今以往。遵照前輩規例。駐錫京畿。夾輔皇室。准坐黃轎。並准乘馬。賞給前輩所供之佛像暨諸法器。尤宜修習經典。宏法利生。以備來日頒賜呼圖克圖名號。茲賞天然如意一。珊瑚念珠一。教主帽一。料爲黃緞。用金繡梵字。蟒緞一疋。黃緞四疋。繡花黃緞襪一。黃緞靠背一。黃緞枕一。藏香十束。由理藩院上摺謝領賜物。並晉謁德宗於中正殿。面謝皇恩。二十日。貢長壽佛一尊。氍毹細氍毹等共九種。每種九件。共計九九八十一件。曼達等七種。每種九件。共計九七六十三件。二十一日。降敕賞賜龍虎二字。由理藩院呈摺謝恩。旋奉諭旨。敕賜法床一座。二十六日。呈摺謝恩。翌年正月初一日。貢長壽佛一尊。黃大哈噠一方。春時上奏清廷。意謂茲擬告假北赴多倫。再抵五臺。禮拜前世塔院。在普樂院修法。復返多倫。更擬西赴母家。旨允所請。遂於三月起節。四月抵多倫。六月時。在多倫之善因彙宗二寺。唸誦自生王經。八月十五日。由多倫晉謁五臺。在

途中各蒙旂王公札薩克及各旂呼圖克圖喇嘛暨各施主等。均請誦經。以保安甯。十月初五日。甫抵五臺。駐錫普樂院。初八日。駕臨鎮海寺。禮拜先世塔院。十二日。五臺山之札薩克喇嘛達喇嘛等。均來頂禮。迎至菩薩頂。盛設大供。誦長壽經。並請念誦其他各經。復蒞各寺。頂禮佛尊。冬至月二十九日。始修法。誦威德金剛經。翌月二十五日。圓滿。誦火經。光緒十四年正月初一日。五臺山章嘉呼圖克圖所轄寺院中之達喇嘛。暨五臺山札薩克喇嘛及其他寺院達喇嘛等。均來頂禮。慶祝新年。北京嵩祝寺與多倫各倉喇嘛。均赴五臺。盛設供品。恭賀新禧。旋應多倫各倉喇嘛之請。於三月十五日。自五臺起節。五月間抵多倫。其年七月十一日。恭辦大喜。庫倫哲布尊丹巴呼圖克圖派遣代表恭賀。外蒙五十七旗。內蒙四十九旗。各旂之王公貝子。札薩克。湯斯拉欺。章京。美倫。塞倫。忒奇。泰般倫。暨各旂呼圖克圖喇嘛大小施主等。計共三萬人。供奉金銀珍寶古玩綢緞駱駝馬牛羊等。總值數十萬金。辦喜五天。光緒十四年九月初七日。入寂於多倫之善因寺。入寂之先。遺囑於衆曰。余之造福不

廣。不能久住人世。初於光緒十二年。蒞京晉謁清帝。繼欲赴哥倫修習經典。上奏告假。准如所請。今則不能去矣。並思皇室寵愛之隆。恩同天日。今特貢佛像一尊。經典一卷。鈴杵一份。念珠一掛。命由喇嘛印務處發交理藩院。上呈清廷。並希寂後。將龕座供於五臺山之鎮海寺。其夜亥時入寂。二十一日。理藩院上奏清廷。德宗旋降諭旨略曰。今朕忽聞章嘉呼圖克圖呼畢勒罕入寂。憂悼殊甚。茲特頒賜佛像一尊。珊瑚念珠一掛。銀曼達一座。大哈唾一方。小哈唾五十。各色藏香五十束。黃緞四疋。陀羅尼經被一。大號貢香十束。供於第十八世章嘉呼圖克圖呼畢勒罕靈前。敕命察哈爾美倫持之往。理藩院遵照前輩章嘉呼圖克圖入寂之例。撥銀一千兩。爲治喪費。旋奉龕座供於五臺山之鎮海寺。

第七節 第十九世章嘉呼圖克圖

第十九世章嘉呼圖克圖。晉封灌頂普善廣慈宏濟光明昭因闡化綜持黃教淨覺輔教大國師。法名鑿迎葉錫道爾濟。誕生於清光緒十七年。轉世於唐克托地。

方。父台吉噶爾瑪林沁。母蘇木濟特。光緒二十五年。奉旨入京。呈貢贖物。晉謁德宗於內廷。深蒙恩禮。賞乘黃輿車。頒賜金印。光緒二十六年。勅授札薩克達喇嘛。駐京任職。加贈前輩各項榮典。光緒二十七年夏間請假。前赴五臺。嗣經續假。出口赴多倫諾爾躲熱。繼因腿疾。續假二個月。復於十一月。由多倫諾爾起程回京。行至察哈爾地方。感冒風寒。又續假二個月。延醫調治。嗣以病未痊愈。再行續假二個月。光緒三十年九月初九日。由蒙古草地抵京。駐錫嵩祝寺。由印務處呈遞理藩院轉奏報到。乞賜召見。貢長壽佛二尊。大哈噠二份。鑿鑿三九。大供香三九。藏松九株。良馬九匹。嗣因京城副札薩克達喇嘛敏珠爾呼圖克圖圓寂。喇嘛印務處呈報理藩院轉奏。請旨簡放遺缺。遂於其年十二月十三日。奉旨欽命章嘉呼圖克圖。補放副札薩克達喇嘛。並管理多倫諾爾之彙宗善因二寺。京師之嵩祝法淵知珠法海四寺。西甯之廓隆廣濟二寺。五臺之鎮海普樂等寺。賞給灌頂普善廣慈大國師印一顆。並敕書一道。光緒三十一年十二月二十七日。遵照前輩規例。加恩欽賞貂皮坐褥九

龍黃傘。仍駐嵩祝寺供奉。光緒三十三年十月。伊克昭盟鄂爾多斯札薩克貝子。呈報五臺山廣安寺喇嘛等。願將廟宇呈遞章嘉呼圖克圖管轄。光緒三十四年十二月二十八日。呈請叩謁大行太皇太后大行皇帝梓宮。呈進哈達各一方。銀曼達各一個。大藏香各二個九把。翌年正月初三日。叩謁梓宮。呈進貢物。在景山關帝廟。率領徒衆誦經。宣統二年二月二十六日。因山西設立保晉公司。理藩部劄飭喇嘛印務處。轉劄章嘉呼圖克圖。將所轄七廟。按照清摺所開股數。量力承認。明白曉諭各喇嘛。以爲保守三晉利益。宣統三年夏。赴五臺。七月。多倫諾爾護印達喇嘛呈報。掌印札薩克達喇嘛章嘉呼圖克圖。現駐五臺。奉經。未能卽赴多倫諾爾接任印務。中華民國元年八月十六日。已時抵京。贊助共和。並勸導內蒙歸附中國。於是內蒙始隨之擁護民國矣。十月十九日。奉大總統令云。

章嘉呼圖克圖特加封宏濟光明大國師名號。此令。

十月三十日。奉大總統批令云。

據蒙藏事務局呈。已悉章嘉呼圖克圖。道行高深。此次翊贊共和。厥功尤偉。應即准如所請。加給年俸銀一萬元。以示優待。此批等因。爲此令行喇嘛印務處知照備案可也。此令。

十一月十二日。奉大總統令云。

章嘉呼圖克圖贊助共和。前已加給封號賚予。其父母等應再特予封錫。以昭優異。章嘉呼圖克圖之父台吉噶爾瑪林沁。著晉封輔國公。其母蘇木濟特。著晉封公夫人。其弟帕克巴札布。著給予三等嘉禾章。其師父達齊札木蘇。著賞給默爾根堪布封號。杜彙果勒呼圖克圖之代表達喇嘛林沁巴勒。著賞給綽爾濟名號。此令。

民國二年二月二十五日。諭札喇嘛印務處。於是日派遣喇嘛二十人進內廷。在大行隆裕皇太后梓宮前轉咒。三月十七日。蒙清室皇上聖恩。頒賞珊瑚念珠一串。白玉十八子一掛。具摺呈進中正殿謝恩。六月四日。奉大總統令云。

蒙藏事務局呈。據章嘉呼圖克圖呈請。商卓特巴贊助共和。請予獎勵等語。商卓特巴札薩克達喇嘛巴彥濟爾噶勒。効忠民國。備著勤勞。深堪嘉尚。應賞坐綠圍車。並賞用黃疆。用昭激勸。此令。

十一月。到京接印任事。並接管弘仁寺事務。呈明大總統請安。貢佛像一尊。哈達一方。西甯廓隆寺巴彥濟爾噶勒。具呈謝恩。供佛像一尊。哈達一方。民國三年。第十九世章嘉呼圖克圖。呈進長壽佛一尊。哈達一方。民國五年一月九日。奉大總統令云。西甯果隆寺章嘉呼圖克圖。原有灌頂普善廣慈弘濟光明大國師。加封昭因闡化四字名號。並金冊一道。此令。

北京嵩祝寺所屬之法淵寺。於民國五年一月八日晚十時。不戒於火。後殿漢經堂五楹失慎。所有殿內銅佛五供。大龕等項。均被焚燬。嵩祝寺殿宇。又因年久失修。援照前此五臺寺廟募修辦法。募化修葺。並由大總統捐洋二千元。以充修建之費。嗣因夏季躲熱。請假五個月。秋季回京當差。至所管京城札薩克達喇嘛印務。及各寺

廟事務。准由該印務處。聲明報部。由部呈聞。依據清例。交札薩克喇嘛分別護理。遂於六月六日。抵多倫諾爾。駐錫彙宗寺。副達喇嘛格勒格札木蘇所護札薩克達喇嘛印信。當日即交其接管。七月二十一日。奉大總統批令云。

章嘉呼圖克圖每年加給年俸一千元。其卓商特巴札薩克喇嘛巴彥濟爾噶勒。賞給本身札薩克喇嘛錢糧一份。以示優異。此令。

并由陸軍部撥馬隊一隊。隨身保護。民國八年。復給導持黃教匾額。奉令勸導外蒙歸附中國。取消獨立。民國十年陰曆正月初八日起至十五日止。年例。率領喇嘛四百名。在後黃寺唸誦伊嚕格勒經八日。及國民政府成立。建都南京。自北方遣使覲見。政府查照舊例。亦畀隆褒。並任命爲蒙藏委員會委員。民國十八年。准設大國師章嘉呼圖克圖駐京辦事處。民國十九年一月十四日。函達喇嘛印務處護印默爾根諾們罕札薩克喇嘛烏敦柱。北平應管二十八處官廟。有無官賣私賣情事。即派交際員會同查辦。三月十三日。喇嘛印務處護印札薩克喇嘛烏敦柱圓寂。當即

選派名次第二之同福寺札薩克喇嘛拉喜丹巴代理。五月。蒙藏委員會提議。喇嘛印務處改組爲喇嘛事務處。當卽訓令喇嘛事務處。嗣後該處應行公函及各令文。援照行臺秘書室成案。均送至行臺秘書室。暫由秘書長代核。後再行呈送本大國師簽章。先後頒發秘書室及所屬各辦事處。佛像一尊。對聯一副。飭令懸掛。民國以來。黃教喇嘛應領口糧。積欠至十年。多不發餉。僧人凍餒待斃。獨大國師爲僧請命。不惜勞苦。奔行經年。乃於十九年下季。邀蒙國府允准。月發口糧費三千元。雖係微薄。而奠定黃教基礎。衆僧衣食得以飽暖。民國二十年。九一八事變發生。翌年四月七日晨十時。在洛之廣寒宮。召開國難會議。是日下午。會衆公推第十九世章嘉呼圖克圖爲名譽主席。時第十九世章嘉呼圖克圖。於四月五日離并。八日晨八時抵洛。汪褚等在站歡迎。並特備汽車一輛。上蓋黃綾。供之乘用。十時出席國難會議。以蒙語演說。十二日晨十時。會議閉幕。卽於十五日北返。十六日午。由洛到鄭。隨卽專車北上。赴石家莊。十九日午。赴晉祠遊覽。二十日離并。駕返五臺。四月九日。行政院

會議。通過特派章嘉呼圖克圖爲蒙旗宣化使。國府於十九日。特派章嘉呼圖克圖爲蒙旗宣化使。蒙藏會請國府於最短期內。派員赴內外蒙古。宣化中央意旨。十二月二十六日晨。章嘉呼圖克圖在國府大禮堂。就蒙旗宣化使職。林主席授印。中央派張繼監誓。行禮後。張繼代中央致辭。林主席致辭。次第十九世章嘉呼圖克圖答辭。繼與中央接洽內蒙政情暨宣化方針。二十八日抵平。駐錫嵩祝寺。成立宣化使署。定期赴蒙宣化。二十二年一月四日。駕返五臺。并於五臺。設立行臺秘書室。駐錫該處。關於蒙旗宣化使公署組織條例。直隸於行政院。掌辦蒙旗宣化事宜。內設總務宣傳兩處。由蒙藏委員會擬訂辦事細則。呈請行政院核定。於七月七日。經立法院會議通過。嗣以東北戰事初定。邊疆蒙衆。亟宜宣撫。於九月三十日。由五臺山乘坐架窩下山。十月二日抵并。五日落平。駐錫嵩祝寺。進行一切。擬定宣化綱要。呈請行政院備案。積極準備出發宣化時所用之漢蒙文各種宣傳品。及通俗圖畫。並組織調查宣傳等股。出發蒙旗。宣布中央德意。八日。北平五臺山普化佛教會普濟佛

教會普明佛教會北平恒善總社漢蒙佛教聯合會全國龍華慈善會佛教居士會
白衣菴善堂萬國道德會紫霞集軒藝林中學等各團體。假中山公園開會歡迎。十
七日。第十九世章嘉呼圖克圖。命總務處長李壽山。宣傳處長宮書士。分赴察綏。轉
往烏蘭察布昭烏達各盟。先往宣慰。並選適當地址。籌設宣化使行署。二十九日。平
市佛教各團體。歡宴之於居士林。席間宏傳黃教佛法。十二月十七日。第十三世達
賴喇嘛圓寂。二十三日。特電西藏駐京辦事處。轉拉薩致唁。文曰。

南京西藏駐京辦事處。轉拉薩司倫噶廈伊蒼並轉全藏僧民均鑒。驚聞達賴
大師圓寂。震悼殊深。值此邊務糾紛。西陲多事之秋。遙念佛輝。彌增關切。敬希
善攝藏政。以固邊圉。而紓中央西顧之憂。特電致唁。並傾微忱。蒙旗宣化使章
嘉呼圖克圖漾印。

二十五日。並致電行政院汪院長蒙藏會石青陽。及百靈廟第九世班禪額爾德尼。
文曰。

南京行政院汪院長蒙藏委員會石委員長鈞鑒。驚悉達賴大師於篠（十七日）日圓寂。震悼殊深。竊以西藏問題。久懸未決。值此藏務主持乏人之際。亟宜派素孚藏民信仰大員。主持一切。冀安邊圉。敬乞察納是幸。蒙旗宣化使章嘉呼圖克圖叩。有（二十五日）印。

綏遠百靈廟。探轉班禪大師慧鑒。頃聞達賴大師示寂西藏。噩耗傳來。痛悼殊深。西藏係邊藩要地。主持端須重望。我師佛教首孳。政治領袖。關衆藏務。自在。蓋籌碩畫。中藏之幸。國家之幸。其惟我師圖之。謹此電達。諸希鑒察。章嘉呼圖克圖有（二十五日）印。

二十三年三月三日。第十九世章嘉呼圖克圖及隨從職員。由平起節赴蒙宣化。分電國民政府行政院蒙藏委員會中常會軍事委員會及察綏省府等處。報告行程。并携帶漢蒙合璧文之宣傳品。如告蒙古之民衆書喇嘛書青年書王公書及總理遺教關於蒙古部分擇要等。備宣化時散發。六日赴包頭。卽由阿王迎請。八日抵杭。

錦旗。阿王召集蒙民。請唵經。開始宣化。四月十四日。由杭錦旗抵包頭。十六日。由包頭到綏。下榻阿王府。十七日晚赴察。轉往錫盟。臨行前。在土默特總管公署演講。四月二十七日返平。五月四日赴五臺休息。并整理寺院事務。駐錫鎮海寺。依例。鎮海寺每年自廢曆六月一日至七月一日。爲開廟之期。並舉行跳鬼大會。漢蒙緇素。朝禮五臺。遐邇咸集。盛極一時。第十九世章嘉呼圖克圖遂乘斯際。唵經一月。藉機宣化。感化蒙民。八月初旬。命秘書李建章首途赴京。呈遞宣化內蒙經過報告書。並請中央指示以後進行方針。九月。復遣秘書蒼吉周威古。蒞京晉謁中央當局。陳述署務。

第三章 駐京各呼圖克圖

第一節 敏珠爾呼圖克圖

敏珠爾呼圖克圖。管理京城東黃寺京倉僧俗徒衆。牧丁三百餘名。多倫諾爾倉並廣宗寺廟內僧徒六十餘名。牧丁一百餘戶。地方面積四十餘里。西甯大同縣

廣惠寺及所屬九寺廟暨各倉僧俗徒衆共計五千戶。無千戶印。代理刑民訴訟。地方面積。長約一百五十餘里。寬約三十餘里。敏珠爾呼圖克圖前輩源流敕書冊檔。以及勅賜物件。向存京倉東黃寺庫內。庚子之役。聯軍入都。倉上蹂躪。商庫一空。聖蹟留芳。蕩然無存。茲將歷世源流簡彙如左。

第一世敏珠爾呼圖克圖。法號札哲色克。源出加噶爾地方。博通梵典。

第二世敏珠爾呼圖克圖。法號朶爲多克多。

第三世敏珠爾呼圖克圖。法號迭查克珠爾。

第四世敏珠爾呼圖克圖。法號巴勒普賴多爾吉。

第五世敏珠爾呼圖克圖。法號雷札拉教。

第六世敏珠爾呼圖克圖。法號達爾麻巴賴。

第七世敏珠爾呼圖克圖。法號達哇碩尼。

第八世敏珠爾呼圖克圖。法號達哇札爾散。

第九世敏珠爾呼圖克圖。法號巴爾丹固木布。

第十世敏珠爾呼圖克圖。法號班丹吉爾朶巴。以上各世。均在加噶爾處圓寂。

第十一世敏珠爾呼圖克圖。法號伊希仲尼。翻譯藏文千覺爾經。

第十二世敏珠爾呼圖克圖。法號海送佛尼。

第十三世敏珠爾呼圖克圖。法號阿旺札克巴。轉世於西藏之查科地方。奉命遣往四川屬之加尼龍哇地方。宣揚黃教。建立札藏寺等一百零八處。

第十四世敏珠爾呼圖克圖。法號隆巴端住布。轉生前藏。達賴喇嘛賞給諾門罕名號。來至西甯修建果莽寺。

第十五世敏珠爾呼圖克圖。法號普爾來端住布。在西藏賀爾地方轉生。迎駐果莽寺。

第十六世敏珠爾呼圖克圖。法號洛布藏丹增。轉生在西甯下郡地方。赴藏習經。雍正五年。達賴喇嘛差遣堪布同敏珠爾諾們罕晉京。瞻仰天顏。頒給敏珠爾呼



圖克圖名號。勅賜重修果莽寺。並蓋寶貝佛千佛殿一座。賞賜法海寺匾額。復賜廣惠寺九龍匾額。賜刻碑文千佛殿。賞大利益殿九龍匾額。旋回果莽寺坐床。雍正十二年。奉旨晉謁任職京師。勅賜朝車朝馬。駐錫東黃寺。選任多倫諾爾掌印達喇嘛。請賜果莽寺廟名。特頒廣惠寺名號。乾隆元年。在多倫諾爾圓寂。奉旨派委侍衛一員。章京一員。銀曼達一座。計重五十兩。大哈達一方。小哈達一方。黃紅香四把。銀百兩。降勅護送龕座至本寺。

第十七世敏珠爾呼圖克圖。在札薩克台吉達麻林色布坦旗轉生。達麻林札布之子。重修果莽寺。勅賜大利益殿名號。乾隆四十五年入覲。任職京師。欽賜襟袍。膝子貂褂朝靴。四十六年。欽賜聖躬已靴。賞淨照大禪師對聯。又欽賜御前紗楞坐床。淨照大禪師銀印一顆。頒給貂皮坐褥朝靴駟馬。乾隆五十年。在京圓寂。

第十八世敏珠爾呼圖克圖。法號札木巴爾丹增尼麻。轉世於剛朵爾山前之查烏素地方。乾隆五十年。勅賜大哈達一方。嘉慶四年。入覲供職。奉旨敏珠爾呼圖

克圖之呼畢勒罕。紫禁城內坐車。欽此。道光十八年。在京圓寂。

第十九世敏珠爾呼圖克圖。法號達麻林札布。父名下觀却加。道光十九年。轉世於西甯之斜尼地方。咸豐三年。入朝晉謁。在京供職三年。後赴藏習經。同治七年。蒞京供差。光緒元年。回西甯本寺。五年赴京供差。光緒七年。在多倫諾爾圓寂。

第二十世敏珠爾呼圖克圖。法號俄科。於光緒九年。轉世於大通縣屬之阿里克族。十三年七月十九日。經理藩院具奏。在雍和宮掣籤後。卽請至西甯倉上學經。二十年十月十六日入都。二十五日。瞻仰天顏。勅賜朝車駟馬。掌管駐京喇嘛印務。二十一年。恭逢皇太后萬壽。欽賜紫氈。二十五年。赴藏學經。旋於光緒二十九年。奉旨赴京供職。三十年。赴多倫諾爾之廣宗寺。在彼圓寂。

第二十一世敏珠爾呼圖克圖。法號多吉加。光緒三十一年。轉世於青海勒地方札薩克台吉齊莫特林增旗內。父名安加爾。入掣於雍和宮之金本巴瓶。宣統元年十月初一日。在雍和宮籤掣。迎至西甯本寺坐床。修習經典。民國二年三月十一

日。淨照禪師詔贊共和。遣使來京輸忱。進貢長壽佛一尊。哈達一方。嚮嚮四捲。藏香四十束。蒙大總統量予封獎。加封廣慈弘教四字名號。並賞用黃疆。四年十一月八日來京。五年三月五日回旗。十一年五月十七日。蒙藏院頒給印信一顆。文曰。敏珠爾呼圖克圖管理所屬僧衆札薩克喇嘛商卓特巴之印。係銅質之漢蒙藏三體文。轉飭京城喇嘛印務處頒發。十三年晉京。時青海霍碩特前左翼中旗札薩克輔國公索多木多爾濟。呈稱敏珠爾呼圖克圖勸化青海民衆。肅清匪患。今逢該呼圖克圖晉京展覲。不忍淹沒其功。請予輔呈賞坐黃轎。以示優異。是年三月二十九日。奉大總統指令。准如所擬辦理。此令。十九年。保舉商卓特巴札薩克喇嘛巴布多爾濟。代轄北平東黃寺廟倉。呈請蒙藏委員會備案。二十年。在西寧創辦漢蒙小學校三處。培養西北人材。蒙國府主席及行政院嘉獎熱心教育四字。二十一年。青海各呼圖克圖推舉敏珠爾呼圖克圖爲代表。晉京請設青海七呼圖克圖聯合駐京辦事處。推進教務。鞏固漢番。遂於其年之冬。由蘭州乘機抵京。籌商設立。旋以絀於經費。

先暫創立青海七呼圖克圖通訊處。由敏珠爾呼圖克圖兼任處長。長期駐京。旋於二十二年。改爲青海七呼圖克圖辦事處。二十三年春。由京蒞平。駐錫東黃寺佛倉。養痾月餘返京。厥後常往來於京滬各處。主持黃教宗務。倡導蒙藏教育。

第二節 噶爾丹錫哱圖呼圖克圖

第一世噶爾丹錫哱圖呼圖克圖。爲黃教領袖。天性聰慧。將今有朱特多特之拉倉。新編成部。人民受持。教化大行。

第二世噶爾丹錫哱圖呼圖克圖。誕生於前藏。坐噶爾丹廟經床。集法教之大成。

第三世噶爾丹錫哱圖呼圖克圖。誕生於西寧札隆廟地方。博通經咒。廣涉史書。坐札隆廟經牀。宣衍法教。厥功甚偉。

第四世噶爾丹錫哱圖呼圖克圖。誕生於西甯。迎赴前藏。在噶爾丹廟講經。闡揚精義。信仰益深。清聖祖仁皇帝。特召來京。旋奉旨赴額魯特喀爾喀講經。蒙古衆

汗王喇嘛台吉等奉爲教主。丁卯年回京。陛見。命在京各廟講經。僧徒皈依者益衆。第五世噶爾丹錫唎圖呼圖克圖。誕生於庫克瑙。少時赴藏習經。學成之後。適奉清世宗憲皇帝諭召。來京陛見。於雍正十三年。寵錫榮典。勅封爲慧悟禪師噶爾丹錫唎圖呼圖克圖。其冊封文曰。黃教創自西天竺國。推傳至東土。以開悟衆生。此中思及繼傳。如有敬謹誦經守教者。朕實嘉念。噶爾丹錫唎圖呼圖克圖。世世著名大喇嘛。行高品重。博學經典。精通佛法。今特封爾爲慧悟禪師。爾尤宜專心修守。勤思深造。廣衍上傳。謹紹佛道。以副朕嘉獎恩施之至意。勉之。並勅建仁壽寺。作爲駐錫京師之倉。乾隆十六年。奉旨賞給慧悟禪師印。二十七年。奉旨封賞商卓特巴札薩克喇嘛印。

第六世噶爾丹錫唎圖呼圖克圖。誕於外蒙三音諾顏部。爲和碩親王成袞札布第三子。發揚黃教。廣衍經典。蒙族咸尊崇之。

第七世噶爾丹錫唎圖呼圖克圖。誕於西寧札木撮揣普藏地方。清乾隆五十

五年。奉旨署理京城札薩克達喇嘛印務。嘉慶十三年。奉旨派赴西藏。往聘達賴喇嘛坐經床喜光。

第八世噶爾丹錫喇圖呼圖克圖。誕於西寧密那克地方。道光九年。奉旨准在紫禁城騎馬。道光十八年。奉旨賞給食札薩克達喇嘛俸糧。是年十二月。奉旨補授副札薩克達喇嘛。

第九世噶爾丹錫喇圖呼圖克圖。誕於西寧揣薩地方。光緒元年。補授多倫諾爾札薩克達喇嘛。光緒二十六年。京師兵燹。京倉仁壽寺被焚。所有印信案卷全行遺失。由本倉呢爾巴喇嘛丹增札木蘇。呈報理藩院。補領印敕。於光緒二十八年四月十一日。蒙理藩院奏准。敕書銀印遺失。請飭補鑄。奉旨依議。欽此。欽遵。敕書於是年六月領出。嗣於光緒三十四年二月。由印務處領出禮部補鑄光字一百四十八號銀質銀印一顆。光緒二十八年六月。蒙理藩院奏准噶爾丹錫喇圖呼圖克圖請賞朝車朝馬。奉旨照例賞。欽此。欽遵。其年七月。在西寧貴德廳原籍地方圓寂。嗣於

光緒三十一年十月。蒙理藩院奏准。奉旨賞給圓寂噶爾丹錫唎圖呼圖克圖。看倉食二兩錢糧徒弟十五名。並留看倉蘇拉喇嘛三名。跟役班第六名。每月由印務處關領看倉錢糧二十四分。

第十世噶爾丹錫唎圖呼圖克圖。光緒三十三年十二月。誕於西寧曲嘎地方。由西寧辦事大臣會同達賴喇嘛。在西寧恭布木寺籤掣。作爲噶爾丹錫唎圖呼圖克圖之呼畢勒罕。民國元年。代表青海蒙番兩民族。輸誠內向。擁護共和。並貢長壽佛一尊。哈噠一方。氍毹四疋。特力默四疋。藏紅花二瓶。藏香六包。政府特嘉誠意。晉封妙悟安仁。民國四年。呈進萬壽佛一尊。哈噠一方。民國五年。西寧梵宗寺噶爾丹錫唎圖呼圖克圖倉之商卓特巴札薩克喇嘛羅藏散丹。呈進長壽佛一尊。哈噠一方。旋於其年六月十九日。賞給車臣綽爾濟。時噶爾丹錫唎圖呼圖克圖之呼畢勒罕。於民國五年二月二十六日。呈請坐床。二十八日。奉批令應准裁撤呼畢勒罕字樣。來京瞻觀。駐京當差。並支給錢糧。將前輩敕書。遵例送印務處。轉行更換。由理藩

院補發新印。俟後隨時啟用。由蒙藏院援案。應給榮典。呈請政府。於四月十七日。奉大總統批令。准如所擬。給予榮典。以示優異。此令。賞坐黃轎。並穿帶膝貂褂。五月三十日。率領徒衆三十人。出口躲熱。請假五個月。繼因赴多倫諾爾學經。請假一年。十月。遣徒業喜桑布等十一人。赴青海原籍省親。民國十九年。中央召開西藏會議。代表青海全部藏族。來京出席。二十一年公畢回青。道經寧夏省屬磴口縣街。猝遭狙害。蒙旂緇素。聞耗悲痛。聯名呈請中央政府緝兇優卹。遣龕迎回青海大佛寺。瘞經禮懺。由該省長官致祭。後轉運德欽寺供奉。

第三節 拉果呼圖克圖

拉果呼圖克圖之源流冊檔。在西寧所屬寺內收存。同治六年。回捻之役。焚於兵火。茲案經籍所載。簡述如左。

第一世拉果呼圖克圖。在西寧塔爾寺修道。康熙五十八年。達賴喇嘛派充大堪布。晉京叩請聖祖仁皇帝聖安。召見時。嘉獎好喇嘛。着留京當差。先遣回藏。事竣

再來。五十九年。經西寧大臣護送至京。召見後。賞給札薩克達喇嘛之職。撥給徒弟五十名。本人頒給六份蘇拉喇嘛錢糧。賞騎朝馬。入班喇嘛。六十一年。奉旨管理熱河喇嘛事務。雍正八年。調管歸化城喇嘛事務。十二年。改管多倫諾爾喇嘛印務。乾隆二十一年圓寂。

第二世拉果呼圖克圖。乾隆二十二年轉世。三十三年來京當差。五十四年。奉旨補授多倫諾爾札薩克達喇嘛。嘉慶元年。兼授章嘉呼圖克圖商卓特巴札薩克喇嘛。嘉慶十六年。進藏迎章嘉國師。於嘉慶十八年到京。旋即圓寂。

第三世拉果呼圖克圖之呼畢勒罕。自轉世後。於道光四年晉謁。留京當差。領食錢糧。道光十七年。在京師喇嘛印務處兼行。咸豐九年圓寂。

第四世拉果呼圖克圖之呼畢勒罕。於轉世籤掣後。光緒十年入覲。留京當差。賞食副札薩克達喇嘛錢糧。跟役格隆五名。班第六名。徒弟二十名。月食餉二兩。俗徒五十戶無餉。多倫諾爾各屬廟僧徒一百五十名內。有十二名食旂餉。其餘無餉。

光緒三十年春。請假三年。回西甯。中華民國二年。晉京入覲。於二月二十五日。奉大總統令云。拉果呼圖克圖贊助共和。素爲蒙旗信仰。茲復來京謁見。備抒悃忱。深堪嘉尚。應加給虔修靜善名號。並賞坐黃車。賚予銀二千元。以昭激勸。此令。十一月。任職掌印副札薩克達喇嘛。呈報大總統。接印視事。是月十六日。率領喇嘛十八名。自備資斧。恭迎德宗景皇帝孝定景皇后梓宮。奉移山陵。永遠奉安。四年二月。因清代舊印。遭亂遺失。由章嘉呼圖克圖代請換給拉果呼圖克圖新印。奉大總統批准。轉咨印鑄局鑄造。虔修靜善闡教禪師喇果呼圖克圖銀印一顆。轉交蒙藏院祇領。七月。擬給假二年。赴五臺虔心爲國誦經。七月十九日。奉大總統批令。准予給假。餘如所擬辦理。此令。二十四日。起程出京。三十一日。行抵五臺山。駐錫弘全寺。並請喇嘛印務處。行文五臺山菩薩頂署印札薩克喇嘛。加意保護。九年六月。呈准大總統府。題給四川松潘縣宏威寺匾額。并發給保護該寺告示。嗣因身病。擬告假赴五臺休養。忽於其年七月初八日卯刻入寂。遺命本倉商卓特巴曼達畢里格。恭呈大總統。

佛像一尊。經典一冊。鈴杵一份。哈唾一方。由印務處轉遞。並將遺龕運回原籍西寧固本寺內供奉。

第四節 察漢達爾罕呼圖克圖

察漢達爾罕呼圖克圖。第一世。於清初投効來京。順治二年。恩賜德勝門外教場地方。自行剏建廟宇。恩賞香火地。座落昌平縣順義縣延慶縣等處。計地七十五頃六十六畝一分一釐。看地黑黃徒衆七十一名。嗣因察罕喇嘛於順治十三年。在西藏軍前効力。蒙恩賞給達爾罕綽爾濟誥敕並黃敕。並由鑲黃旂蒙古都統。支給俸銀米石。歷輩支領。順治十八年圓寂。

康熙元年。第二世察漢達爾罕綽爾濟喇嘛。轉世於土默特旗下。康熙三十六年。出中路兵。著有軍功。恩賞黃圍車朝馬等件。康熙三十八年入寂。

康熙三十九年。第三世察漢達爾罕綽爾濟喇嘛。轉世於西藏。入瓶籤掣。於康熙五十六年。來京瞻仰天顏。奉旨賞給繡龍木床兩份。繡龍椅子一座。康熙六十年

入寂。

康熙六十一年。第四世察漢達爾罕綽爾濟喇嘛。轉世於西藏。雍正十三年圓寂。

乾隆元年。第五世察漢達爾罕綽爾濟喇嘛。轉世於阿魯科爾沁旗下。嘉慶三年圓寂。

嘉慶四年。第六世察漢達爾罕綽爾濟。轉世於阿魯科爾沁旗。道光十四年四月。奉旨來京。因其駐京有年。從前著有軍功。撤消綽爾濟。賞給呼圖克圖職銜。換給誥封並黃敕。仍由鑲黃旗蒙古都統。支給俸銀米石。又着倉徒格布隆蘭占巴二十名。每月每名支給銀二兩。米七斗五升。道光十五年。簡放多倫諾爾掌印札薩克達喇嘛。道光十六年圓寂。

道光十七年。第七世察漢達爾罕呼圖克圖之呼畢勒罕。轉世於阿魯科爾沁旗下。道光二十三年四月掣瓶。年七歲。咸豐二年來京。奉旨裁撤呼畢勒罕字樣。作

爲呼圖克圖。咸豐十年四月。補放京城副札薩克達喇嘛。同治六年間。簡放多倫諾爾掌印札薩克達喇嘛。同治十三年圓寂。

光緒二年。第八世察漢達爾罕呼圖克圖之呼畢勒罕。轉世於阿魯科爾沁旗。光緒五年四月。在雍和宮金本巴瓶內掣定。光緒十四年起程。十五年二月十九日。來京瞻仰天顏。奉旨裁撤呼畢勒罕字樣。准其作爲呼圖克圖。駐京當差。蒙賞前輩所食俸米。並給隨帶徒弟噶布楚蘭占巴二十名。每名每月各食銀二兩。光緒十八年。請假赴藏。修習經典。假滿。又於光緒二十八年。續假三年。在原籍侍奉親疾。宣統元年六月。簡放京城喇嘛印務處副札薩克達喇嘛職銜。恩食隨徒十一名。其本身一分。並未支領。民國二年四月十一日。遣徒來京。慶祝共和。貢如意一柄。哈噠一方。特力默四疋。藏香十束。五月。奉大總統批准。加給誠修淨性四字封號。並賞穿帶懸貂褂。其年來京。駐錫察漢喇嘛廟。貢長壽佛一尊。哈噠一方。氍毹四捲。特力默四捲。藏紅花二瓶。藏香四束。十年十二月九日蒞京。恭備各項嘑經之差。惟自外倉阿魯

科爾沁旗起程時。適值天寒。沿途卽患腰腿疼痛。十一年三月二十五日。請假十個月。回阿魯科爾沁旗外倉調治。夏時卽在外倉避暑。十三年六月。奉令准其乘坐黃轎。旋赴口外。駐錫本倉。

第五節 洞闊爾呼圖克圖

洞科爾呼圖克圖。自初世轉世至第十一世以前。向在西寧洞闊爾地方化俗度衆。番蒙歸心。駐錫西寧洞闊爾寺。察哈爾之多倫、達模沁、阿呼爾沁等各處。均有隸屬寺宇。清代任職京師。駐錫北京雍和宮之洞闊爾倉。

第十二世洞闊爾呼圖克圖。初駐西寧洞闊爾寺。宏法利生。清順治十六年。以番民信仰。奉旨進京。頒給諾們罕名號。任職京師。時值原籍紅黃兩教屢起衝突。專事仇殺。多年不解。奉旨回籍。調和解釋。由此息爭。衅端不起。康熙四年三月。特賞鍍金獅紐禪師印一方。其文曰。蠻朱什哩禪師之印。及勅封一道。康熙九年八月。在口外圓寂。

第十三世洞闊爾呼圖克圖。清康熙十四年轉世。旋在西藏金本巴瓶掣籤。消除呼畢勒罕名號。十六年奉旨進京。入朝瞻覲。特頒恩旨。紫禁城內准予乘馬。嗣簡札薩克達喇嘛。有功教務。賞賜珊瑚念珠蟒緞兩疋。旋因告假回籍。至康熙三十六年。在西寧洞闊爾寺圓寂。

第十四世洞闊爾呼圖克圖。初。聖祖旨諭西寧辦事大臣。令速尋獲第十四世洞闊爾呼圖克圖之呼畢勒罕。旋即遵旨尋覓。援照舊例。滿入金本巴瓶內掣籤。上奏清廷。康熙五十五年。撤消呼畢勒罕名號。奉旨進京。瞻仰天顏。特蒙召見。賞賜福壽二字。簡放札薩克達喇嘛。任職京師。因病請假回籍。旋即圓寂。

第十五世洞闊爾呼圖克圖。遵例尋出呼畢勒罕。於清乾隆九年掣瓶。是年即往西藏修習經典。二十三年。奉旨來京。晉謁高宗。簡放黃寺達喇嘛。因主持教務有功。消除諾們罕。勅封呼圖克圖名號。奉旨駐錫雍和宮之洞闊爾呼圖克圖倉。簡放札薩克達喇嘛之職。三十六年。告假回籍養病。乾隆四十一年。在籍圓寂。

第十六世洞闊爾呼圖克圖。

第十七世洞闊爾呼圖克圖。以上兩世之呼畢勒罕。因未出痘。尙未來京。在籍卽行入寂。

第十八世洞闊爾呼圖克圖。清道光八年轉世。奉旨掣瓶。消除呼畢勒罕名號。十二年。來京瞻覲。奉旨駐京。任職宗務。照例恩賞前輩禪師印冊封典。咸豐元年。因值匪亂。特在雍和宮唵誦平安大經。加賞慧聰封號。掌管多倫諾爾札薩克印務。繼掌京城喇嘛印務處正印事務。同治十一年。報効馬匹七百匹。光緒十四年。因大旱。奉旨在黑龍潭祈雨。得降甘霖。賞賚哈噠袍料等件。並歷年蒙賜皮磁緞疋無數。光緒九年四月初一日。在雍和宮本倉圓寂。卽蒙特賜銀曼達一座。大哈噠十個。藏香百束。珊瑚念珠一掛。紋銀三百兩。旨諭龕座馳驛。送回西甯原籍。供奉本寺。

第十九世洞闊爾呼圖克圖。轉世後。光緒十九年。在雍和宮掣瓶。消除呼畢勒罕名號。晉封呼圖克圖。二十五年。奉旨來京。瞻仰天顏。賞福字一軸。二十六年。請假

回籍修習經典。三十四年來京。勅賜召見。蒙賞紫禁城內特准乘馬。簡放雍和宮札薩克達喇嘛。宣統元年八月。在口外圓寂。遵照前輩條例。頒賜御物。

第二十世洞闊爾呼圖克圖。宣統二年。轉世於察哈爾。在雍和宮掣瓶。坐床於察哈爾。民國元年十二月十九日。呈進贖物。贊助共和。二年三月十一日。奉大總統令。晉封明淨慈祥四字名號。三月四日。命令京倉商卓特巴托布丹噶拉桑。給予綽爾濟銜。同日西甯所屬洞闊爾固木巴胡瓦哩楚爾吉堂洞闊爾廟共三處達喇嘛察克吉木巴唐臧嘎布松。均給予綽爾濟名號。尙未至西甯及京師。卽行入寂。享年九歲。

第二十一世洞闊爾呼圖克圖。民國九年。轉世於青海隸屬之弗才地方。遵照前輩規例。於京師之雍和宮抽籤。迎入西寧本寺坐床。十三歲。蒞西甯塔爾寺。修習經典。至今尙駐寺中。

阿嘉呼圖克圖。自明永樂十五年之第一世。以迄第十五世。均在西甯塔爾寺。掌理寺務。五族七川之番民。尊爲寺主。察哈爾有游牧地一段。座落卓楞巴噶布爾噶蘇臺。德勒蘇臺等處。北平雍和宮。有阿嘉呼圖克圖倉。支領札薩克達喇嘛本身錢糧一分。隨帶徒弟格隆六名。班第六名。噶布楚蘭占巴二十名。清乾隆十一年。瓶掣第十六世阿嘉呼圖克圖。是年三月。消除呼畢勒罕名號。奉旨晉京朝覲。敕賜述道伯勒各圖諾們罕印一顆。誥封一道。賞賚朝車朝馬。給俸留京。駐錫雍和宮。簡署札薩克達喇嘛副札薩克達喇嘛。十二年。於本倉添設札薩克達喇嘛一缺。十三年。徒弟衆多。避暑於多倫諾爾慧宗寺。敕賜游牧地一段。座落察哈爾地方卓楞巴噶布爾噶蘇臺。德勒蘇臺等處。所有隣近各旗。皆由各總管出具甘結。照檔註冊。立明邊界。造具詳細圖說。東西十五里。南北二十里。繪圖存案。乾隆三十一年九月二十一日圓寂。

第十七世阿嘉呼圖克圖。法號羅布藏札木養札木蘇。曾經理藩院代奏。在京

雍和宮掣瓶。乾隆五十一年來京。晉謁高宗。消除呼畢勒罕名號。五十二年。請假回籍。研究經典。五十八年八月十一日。晉京。蒙獎聰穎異常。貫悟眞經等語。簡放札薩克達喇嘛。管理福佑寺事務。所有前輩恩賞勅物。照舊應用。嘉慶三年。簡放札薩克達喇嘛及副札薩克達喇嘛之職。是年奉旨遣往庫倫哲布尊丹巴呼圖克圖傳經。相歷數年。因功加給顯能禪師封號。賜述道禪師印一顆。又奉旨飭掌多倫諾爾喇嘛印務處事務。嘉慶二十一年十一月二十二日圓寂。

第十八世阿嘉呼圖克圖。法名業喜海羅布藏札木蘇。於嘉慶二十二年轉世。道光元年。在京師雍和宮掣定呼畢勒罕。七年十一月二十五日。晉京召見。消除呼畢勒罕名號。留京當差。十一年。敕賜多倫諾爾慈福寺廟名一座。設立達喇嘛。得木奇、格斯貴各一缺。十三年。奉旨入藏。考查經典。十五年。特賞述道禪師印一顆。誥封一道。十六年九月二十五日。晉京謝恩。十七年。簡放札薩克達喇嘛。二十三年。奉旨遣往庫倫致奠哲布尊丹巴呼圖克圖。二十六年六月三十日。賞管京城喇嘛印務。

處事務。七月十六日。管理唐古忒學事務。九月二十九日。奉旨兼任弘仁寺事務。三十年二月初十日。在圓明園賞春羅大褂一件。灰色甯綢棉襖一件。駝色及米色甯綢袂襖各一件。珊瑚念珠一掛。玉盒一個。珊瑚墜節荷包一對。及宣宗成皇帝升遐。隨扈梓宮。咸豐六年正月二十九日。因疾告假。並請開缺。諭以勿庸開缺。賞假四個月。因疾未愈。復請開缺。旨諭准允所請。許續假三年。回籍調理。同治元年。回捻倡亂。道途阻隔。不能晉京。遂返塔爾寺。舉辦團練。保護寺宇。拯救災黎。所有西甯五族七川被害難民。多有逃歸塔爾寺。各予口糧。俾全性命。回捻屢犯塔爾寺。呼圖克圖親冒矢石。督率團勇。極力捍禦。保衛寺民。並且援解西甯城圍。旋奉諭旨。調集番兵。自備資斧。助勦賊匪。共歷六載。晝夜勤勞。以致積勞成疾。一病不起。於同治八年五月十一日。圓寂於西甯之塔爾寺。五族七川及丹噶爾士民。聯名呈請入奏追獎。由西甯辦事大臣豫師轉奏。於同治十一年正月二十九日。追獎顯能二字。

第十九世阿嘉呼圖克圖。原名羅布藏丹畢旺楚克索那木札木蘇。於同治十

三年轉世。光緒元年。在雍和宮掣瓶。七年十二月。晉京入覲。八年正月十四日。消除呼畢勒罕名號。九年十一月二十五日。簡放副札薩克達喇嘛。十年九月二十三日。回籍受戒。二十年十月初二日。在南海晉謁皇太后。欽賜繡花黃蟒袍一件。黃緞兩疋。御筆福壽字一軸。福壽元寶六百顆。初四日。恭逢皇太后壽慶。蒙帝欽賜朝車。又賞加慧聰名號。十七日。復在南海接駕。二十三日。敕賜黑地繡花蟒袍二件。黃緞兩疋。如意三具。御筆福壽字四軸。十一月十四日。奉旨掌管喇嘛印務處事務。授札薩克達喇嘛。管理弘仁寺事務。十二月初五日。管理唐古忒學事務。二十八年。回籍省親。三十年十月初八日。回京任職。賞心經一部。珊瑚念珠一掛。如意一具。繡花黃蟒袍一件。敕賜正副喇嘛印。三十一年。因病。請假回籍。宣統元年閏二月二十三日。在西甯塔爾寺圓寂。

第二十世阿嘉呼圖克圖。原名策巴札布。初。第十九世阿嘉呼圖克圖。自宣統元年入寂。西甯塔爾寺之商卓特巴綽爾濟喇嘛等九人。赴西甯所屬地方。尋訪呼

畢勒罕。旋於固明地方尋獲策凌之子策巴札布。及西甯遠噶隆地方尋獲索達噶之子森巴札布二名。均著靈異。時年六歲。於民國四年六月十六日。由蒙藏院副總裁。恭詣雍和宮。拈香行禮。會同護理京城喇嘛印務之札薩克喇嘛。將該二子繕寫名籤。封於金本巴瓶內。唸經三日。至十八日。由蒙藏院總裁貢桑諾爾布。會同護理印札薩克喇嘛。掣出策巴札布。二十一日。奉大總統批令照准。初於民國元年。西甯塔爾寺貢長壽佛一尊。哈噠一方。氍毹四疋。特力默八疋。藏紅花一包。紫藏香四十束。民國十年四月四日。發交阿嘉呼圖克圖商卓特巴札薩克喇嘛銅質印信一顆。由蒙藏院轉交喇嘛印務處具領。民國十四年二月。阿嘉呼圖克圖之呼畢勒罕。來京入覲。懇請援案撤銷呼畢勒罕字樣。賞坐黃轎暨承用前輩各項榮典。由蒙藏院轉呈。於二月十六日。奉臨時執政指令。呈悉。准如所擬辦理。此令。并給予副札薩克達喇嘛職銜錢糧。其隨從之噶布楚蘭占巴二十名。每名每月各給錢糧二兩。由蒙藏院呈請臨時執政。於十四年四月十日。奉臨時執政指令。呈悉。准如所擬辦理。交財

政部查照。此令。民國十五年。請假出口避暑。並清理屬廟。

第七節 土觀呼圖克圖

勅賜佑甯寺淨修禪師圓覺妙智名號土觀呼圖克圖。第一世土觀呼圖克圖。轉生於西甯東川紅哈腦上之土觀莊。於明代在本川果隆寺薙髮爲僧。清康熙五十四年。奉旨晉京引見。聖祖賞賜呼圖克圖淨修禪師名號。繡龍黃傘一座。繡龍黃墊一件。元狐大褂一件。八寶御帶一條。賞乘黃轎朝馬。賜禪師像一軸。賞食錢糧。每月本身食銀四兩二錢一分二釐四毫。隨缺格隆五名。各食銀八錢九分九釐一毫六絲。班第六名。各食銀八錢六分五釐二毫七絲二忽。又徒弟二十名。各食銀二兩。雍正間。奉旨賜果隆寺以佑甯寺名號。奉旨瞻仰天顏。雍正十二年四月。世宗敕賜雍字第一百七十號淨修禪師銀印一顆。遵卽祇領。乾隆元年。告假回籍。乾隆二年。圓寂。

第二世土觀呼圖克圖之呼畢勒罕。自轉生出世後。由西甯欽差大臣轉奏清

廷奉旨飭西藏達賴喇嘛。掣出呼畢勒罕。蒙高宗恩准。着往西藏修習經典。乾隆二十八年。奉旨進京。勅賜誥封。駐錫京都之北黃寺。乾隆三十三年。因病告假回籍。乾隆三十五年。高宗勅賜土觀倉廣慧寺名號。乾隆三十六年。奉旨入覲。駐京當差。乾隆四十九年。前往熱河。晉謁高宗三次。頒賞如意荷包福字等件。乾隆五十五年。建修紅溝寺院一處。報明西甯欽差大臣轉奏。高宗敕賜延禧寺名號。嘉慶初。仁宗恩賞緞疋。嘉慶七年。圓寂。

第三世土觀呼圖克圖之呼畢勒罕。自掣出後。因病未能晉京當差。旋即入寂。

第四世土觀呼圖克圖之呼畢勒罕。九歲身故。

第五世土觀呼圖克圖。道光十九年轉生。道光二十四年。掣定呼畢勒罕。咸豐三年。晉京。蒙理藩院轉奏。在保和殿引見。奉旨駐京任職。旋告假學經。同治三年十一月十五日。奉旨晉京。蒙理藩院代奏。文華殿引見。恭請聖安。卽於是日支領錢糧。駐京當差。同治四年十二月十七日。報呈喇嘛印務處。咨呈理藩院轉奏。仰懇皇恩。

所有先皇帝恩件各色物件。照舊應用等因。奉旨允准。又欽奉特旨。執掌喇嘛印務處事務。駐京任職。光緒三年。告假回籍。光緒九年。奉旨晉京當差。光緒十四年。德宗大婚。欽賞朝馬。光緒十六年。告假回籍。修理寺院。光緒十九年。奉旨晉京當差。光緒二十年。正月初九日。紫光閣入宴。欽賞朝車。十月初六日。恭逢皇太后大慶。欽賜黃韁。是年十月二十六日。在京圓寂。

第六世土觀呼圖克圖。於光緒二十一年轉生出世。光緒二十六年。掣定呼畢勒罕。光緒三十一年。進京瞻仰天顏。是年十一月十八日。由理藩院觀驗。十九日。在南海宮召見。皇太后皇上見喜。卽裁撤呼畢勒罕字樣。賞呼圖克圖之名。賜福字一軸。吉祥哈達一方。十二月初十日。降勅着賞給靜修禪師名號。副札薩克達喇嘛職銜。並賞頒印敕。留京當差。十二日。在乾清宮逢頭召見皇太后皇上。欽賜福字一軸。十四日。奉上諭。欽賜黃韁。賞乘綠圍朝車朝馬。十五日。在神武門外逢頭謝恩。二十三日。特賞花瓶。裙襪。荷包等件。光緒三十二年。呈報喇嘛印務處。轉咨理藩部。代奏。